

Auxa zexaldixa

Duwe Jesúja auxa zexaldixa mu zuñgisekuane Juaña gaune zuñgajienapanaldiamak

Meja ai kalta gauwane: Duwe Jesúja 12 shaxaldixakuega aldéñ izhgajañguxa Juaña jalde kalta gauwane. Ega na Duwe Jesúja ají múldigaba guaxaldixa gaxanekue naña agatsé. Dueba negatshak jiaga Duwe ipananekeue aksaneka izhogué, Duwe Jesú shalda guiyaba atuñshiña kagi nóñgutse níbunixa izhuka Padmuxa abexane noguéñ jalde kalta gauwane (1.9).

Mekuetshi kalta gauwane: Juaña Asia baxe kuíbuldu kugua Duwe ipananekeue ishjuizhaldekakuek jalde kalta kagakauwane (1.4). Guatshak saldiña Duwe ipananekeuetshi jiaga gauwane.

Jinak ai kalta gauwane: Jatetshi Aldunajaña Juañ aksanegatshak, aldunaldiña Duwe Jesúja auxa zegatshak sakí zexaldixa tuñsha. Duwe Jesúja sakí tuñshanauxa aldéñ ipananekeuetshi kalta gauwakue akbeyatshak, amak jalde kalta gauwá. Jika atú guazhámak agatsé tune kagajienaldiamake, jika atuñkakue na izhguashiji guaklde. Atshake Alduma zaldakueja Duwe ipananekeue matshuwi sha kakuí, guiyaba katuñshatone. Akna, Juaña auxa zegatshak Duwe Jesúja saldiña aguldiñkakue, shanekue nuk agubiyaldixaga ne katuñshi, aldunaxa kakuiyakshaldiamak jalde kalta gauwane. Ekíki abá naldakí Duwe Jesúk agapa aldeyalga aldoxaldiamak.

Ji, ji shalda guashi jalde kalta gaune:

1. Kasak kakkbene (1.1-8)
2. Duwe Jesú sakí agatsé tune (1.9-20)
3. Duwe Jesúja kugua kuíbuldu nekuexa e ipananekeue izhajuizhaldekakuek kakkbene (2.1-3.22)
4. Juaña jékaldaxa zutune (4.1-5.14)
5. Jubeju zhauwa jananeja kalta kugua juizha ishkatuñguane ishkwatiane (6.1-8.1)
6. Jateja guaklde uldeñkakue kugua tata axazajuigatshak atemajañ guiyaba zeklde (8.2-11.19)
7. Ezua ezua atú guazhámak agatsé tune (12.1-14.20)
8. Kugua migisalshá guakuekue (15.1-16.21)
9. Babilonia na izhguaji ezua munzhi béyakze sha makuakuek ité tune (17.1-18.24)

10. Jékaldaxa zhinik kabayu abutshik ite nagatuka (19.1-21)
 11. 1.000 kagi zexaldixa (20.1-6)
 12. Guiyaba atualdieña kakuatayane (20.7-15)
 13. Abisa alnoba, abisa kagi, abisa Jeldusaldéñ (21.1–22.21)

Duwe Jesúja auxa zexaldixa mu zũngisekuane Juaña gaune

1 ¹Nas Juañ jalde miñgakuwatokugeki Duwe Jesú Zũnekualka mu zũnkiyasekuane xalte. Aiki Saldiña netshi Jateja Asukuá Duwek agé guane,^a ekíki sakí zexaldixa zegakuamak zexaldá guapanká kaxazauñkakuañki zũnatuñshaldiamak. Amak zũñwashekualdiamake, Duweja zhiniki axazauñkugek aldéñ guaklde uldeñkak nagixaune. ²Akna Jatetshi múldigaba, Asukuá Duwe Jesú Zũnekualkaja guakldamakga natuñshanamak miñgakuwatokuge. ³Ekí Jatetshi múldigaba naldiña zũxaitshiji kalta gauwatokugeja zexaldixa guagamak zexaldá guapanakna, mieldeke ai mizukuakshaldixake zeñ minaldaldixa. Ekíga na, mieldeke ai nukshi amak atshál minukake zeñ minaldaldixa nzha.

⁴Nas Juañ, Asia baxe kuíbuldu kugua^b Duwe ipanaminekue mishjuizhaldekakuek kalta miñkuzgauwatokuge. Saldiña netshi Jate atemajañ éegaba guañ mimajañgui, muldetua aldunaxa señgaba miñzukui shi mimezhokshí. Ekí miñkatshixaki izhoshiña nagatogamak kaiga izhukaga, niuwizhíne jiaga izhoshiña izhogataná. Ekí miñkatshixaga na, ají Alduna kugua naldashiña^c ne Jatetshi sanexa xaldoxé staxa izhuka. ⁵Ekí miñkatshixaga na, Duwe Jesú Zũnekualka, eñki tunauxabe guaxal za nuka.^d Aldénga na shuiguenik shuigazhíta kasaklde izhgate,^e saldiña kagik sanék guxakuetsi Sáñkalda izhuka. Aldéñki zũnajañgui, nauwitsaldí abi akzuldi shuigatshakna, sha katsnixatshi nashi kaldalgué, aik zũnebesanshá. ⁶Guñgueni aldénga sanegakualdixa zũnezhagatshak, Saldiña netshi Jate Ajatega axazauwi múldigaba agaskaitshatogakualdixa zũnaldekshane.^f Aldéñ za saldiñgaja akldé akzamakga agazukual za noshiña shi noshí. Ekibeña aldéñ za saldiña na nahauxa aksanekaga shi naldataní. Ekíga shi naldí.

^a 1.1 Jñ 12.49 ^b 1.4 Jalde kaltak anuñka juizha “kugua” guaxaldixa. Jinake naldakí. Juldiúkujañki “kugua”ki auxaga ne guashi akuaka nak. ^c 1.4 Is 11.2. Jatetshi Alduna ezua me naldatshak, kugua naldashiña guagatshak, eñki auxaga ne, auxaga kama axaldé guashi. ^d 1.5 Jñ 18.37 ^e 1.5 1Kt 15.35-57; Kls 1.18 ^f 1.6 1Pe 2.5; Aux 20.6

7 ¡Tu guwíñ, Duwe Jesú mauwixa nagaté!^g

Saldiñgaja kauwiji ubak naldi ekí nagaté atualdixa.

Ekí atuatshakna aldéñ akuaxá guanane,
suza agaldeñshananekeuja^h jiaga atualdixa.

Atshakna saldiña saná kagik zhekuauxa nekueja
e shalda izhajaniñgaba abauwaldixa.ⁱ

¡Akzé! Ekíga shi naldí.

⁸Saldiña netshi Jate nauwiji Sáñkaldajaña ekí ni guak: “Kasaxa zalda naldaldatshak jiak nasga asugaxa zalda na nakú.^j Naski izhoshiña nagatokugamakga kaiga izhokugega, niuwizhíne jiaga izhoshiña izhogateñkuge. Nasga na auxaga kama naxaldé, saldiña naksuikuegaba nzhakú.”

Duwe Jesú sakí agatsé tune

⁹Nas Juan Duwe Jesúk zhinik mimikaja naugék, etshi kaldakna maiñ naña guiyaba tuañkaldogatsak jiaga Duwe zuñsanegamak axatshiji, iyabá náaldaki abeti kizhuka. Nalguák Jatetshi múldigaba, Asukuá Duwe Jesúja guakldamakga guagukuéñ zhinik, kagi nóñgutse nñbunixa izhuka Padmuxa guiyaba nawatuñshiña nabexane ¹⁰nogukueña na, nauwiji Sáñkaldalduwañki^k Jatetshi Alduna naksanegatsake, aldunaldiña nashaneldi zhinik tata jaldáñ negamak neshi ekí múldigaba naxazakuaká nuká: ¹¹“[Kasaxa zalda naldaldatshak jiak nasga asugaxa zalda na nakú.] Sakí tuabalduka kaltak gauwa xaldeki Asia baxe kuíbuldu kugua nekuexa nepananekue izhajuizhaldetakuek kakuzgauwa makualdí. Aikueki Epesu,^l Esmilda, Pélgamu, Tiatilda, Saldi, Pildadelpia, Aldauldiseya^m zaldakuek kabakuzgauwaldí.”

¹²Nukañgukuake “¿me ekí naxazguaká?” nakldeguake eni zhiibaték tu gualdatshake, niubaga kugua agatsalda guksé muñshí stualdiamak agaldaka tualdatshak, ¹³ai kenañki Jatetshi Asukuága ixagabaldekldeⁿ janagatse tu. Ají zhakuáki akzé tshakue kasaxa duwá agatsé ijuakue, tabáxaldake niubaga akbakue. ¹⁴Ají saiki abutshi, mulda azhi nuabi tu abutshi, ají ubaki guksé nuñkua tuñgatse, ¹⁵ají kasaki shezhaxalda^o gukseldek guane, muldetua ishuwane tubá stuñka jana agatsé, ají múldigabaki nitaxalda atema ishkaldegamak zukuaka.^p ¹⁶Jibatshaldi mualki kugua zumeya aksuikue, ají kaxake shezhá mushtabaña zaxa akzaxaitshixá,^q ají waxaki niuwi stuakldegauxa stuamakbé stuñka tu.

¹⁷Ekí e tualdatshakna asták shuanuge jana napená.^r Guakna aldéñki ají káuxalda jibatshaldi ne nepañgui ekí nakbeyá: “Zhe mikzegagába nogwá.

^g 1.7 Dn 7.13 ^h 1.7 Jñ 19.34 ⁱ 1.7 Zac 12.10; Mt 24.30 ^j 1.8 Galdieguke “Alfa y Omega” akuaka. “Alfa”ki “a” jana kasak guashi, “omega”ki “zh” jana asuxa guashi.

^k 1.10 dumiñkuk ^l 1.11 Ajsh 18.19 ^m 1.11 Kls 2.1 ⁿ 1.13 Dn 7.13; Mlk 8.31; Aux 14.14

^o 1.15 “bronce” ^p 1.15 Ez 43.2; Dn 10.6 ^q 1.16 Eb 4.12 ^r 1.17 Ez 1.28; Dn 8.17; Ajsh 26.14

Naski kasaxa zalda naldaldatshak jiak nasga asugaxa zalda na nakú.^s ¹⁸Naski izhoshiñga izhokugéñ zhinik na, nakuaxa akuatshak jiaga izhoshiñga izhogateñkugé.^t [Ekíga shi naldí.] Shuixak agubiya guanuge nak etshi yabi naksuikue, shuanekue jituatogeñka zalda yabi jiaga naksuikuega nakldá. ¹⁹Akna sakí zeká, kaiga zhinik sakí zexaldixa matuauxa kalta gauwa guwá.

²⁰”Guatshak kugua zumeya jibatshugaldi mual naksuikue tumalde migajienazháneki ekí guashi: Aiki guaklduge uldeñkakue, kuíbuldu kugua nekuexa nepanankue aksanekakue guashi. Ekibeñga na, niubaga kugua agatsalda guksé muñshí stualdiamak agaldaka tumalde migajienazháneki ekí guashi: Aiki kuíbuldu kugua nekuexa nepanankue izhajuizhaldekakue guashi nakldá.”

Epesuxa zaldakuek kakbene

2 ¹Guñgueni ekí nakbeyá: “Guaklduge uldeñka Epesuxa nepanankue aksanekak ekí kalta agakauwa guwá:

Nas kugua zumeya jibatshugaldi mual naksuikuek, nasga na niubaga kugua agatsalda guksé muñshí stualdiamak agaldaka kenañ mishkugek ni ekí miñmeñkú. ²Naski atshabinogauxa nakué nakna, jiba minaxatshaldiamake kama ilshiji mizhekue, guiyaba tuabinogatshak jiaga abá náaldaki abeti mizhekue jiaga nakualdi minuka. Akna nas nakueki, sha atshixakue ni nauwa ipanagába,^u mieldeki naldagálde nuxa ‘Duwejañga ají múldigaba guaxal nakaxane nakldá’ nekakueki muldetua kakuaja miñguatshak, naldagálde zukuakakue nuxa tumine.’ ³Maiñki nají miné shalda guiyaba tuabinogatshak jiaga miñgusanagába, abá náaldaki abeti mizhekue.

⁴Guatshak jiaga ezua agatsalda nakldunazhé miyatshixá miñmeyaldikue: Kasak minezhgajañguxá nanamake nezhgajañguabiñsá guamine tuashakú. ⁵Akna miya zhinik akjenamine nake bezhgisekua, ekí miyatshixá majiñga maja xaldeki nagakualdi, kasak minepanatshak sakí nezhgajañgui miyatshixá nanamak mokue atshapana guwiñ. Akze, nagakualdinakí minaldaldiák, miñkaldeyaldikuenik guksé muñshí stualdiamak agaldaka jana miné ne exa izhogaksánshaldikue.

⁶Ekí ne, azbuanki janshibeñga ni miyatshí: Aiki nas namak giemi nikuldaitakue^w ajanashixá ni nauwa nakldunazhámakga maiñ jiaga miñnunagálde.

⁷Mieldeke kuxa miñkaldikueke Jatetshi Aldunaja nepanankue san san izhajuizhaldekakuek kakbeñká muldetua nuka guwiñ. Mieldeke

^s 1.17 Is 44.6; 48.12 ^t 1.18 Alm 6.9 ^u 2.2 2Jñ 1.10-11 ^v 2.2 2Kt 11.13; 1Jñ 4.1

^w 2.6 Aux 2.14-15. Nikuldaitakuejañki Duwe Jesús zúnzabí guane shalda na sha atshanazunakaga akuaka nane.

kutám atshák agubiyal mizhukake Jate nugeñka janshí zeñka kaldi izhoshiña mezhokshakue^x aklduka gaminaka niuwi miñgexaldikue nzha.”

Esmildaxa zaldakuek kakbene

⁸Guñgueni ekí nakbeyá: “Guaklduge uldeñka Esmildaxa nepananeke aksanekak ekí kalta agakauwa guwá:

Naski kasaxa zalda naldaldatshak jiak nasga na asugaxa zalda naugé, nakuaxa akuñgueni mokue izhgateugek ni ekí miñmeñkú.

⁹Naski jibañ tuabinogauxa, jika miñgajueshkakue nakualdi minuka, naldatshak aldunaldiñki kabiaga miné.^y Ezuakueki aguáñ mimezhashiji nalda miñkakuaká jiaga nakualdi minuka. Ekueki ‘juldiú sanákuega^z na kaldá’ aldegatshak jiaga, aldunaldiñki ai naldagáldekue,^a jisé axazauwal za izhajuizhaldekakue.

¹⁰Guatshak sakí guiyaba mitualdixa shalda zhe miñzegazháldi. ¡Egabá be nogwíñ! Jiséjaña aksanekldekueja anuñka minekuañki kalseldi mimabexaldixa, ekíki mimakuajaldiamak. Gualdini uguá ldiuwi guiyaba mitualdixa. Ekí tuabinoxaldiéñ shuigakue miñgatsexaldiák jiaga, naziyabá naldakí alduna nazishijiña mishuixaldí. Ekí miñgualdiakna ubiyamine mimawatualdiamak jékalaxa izhoshiña izhoxa miñgexaldikue nzha.^b

¹¹Mieldeke kuxa miñkaldikueke Jatetshi Aldunaja nepananeke san san izhajuizhaldekakuek kakbeñká muldetua nuka guwíñ. Mieldeke kutám atshák agubiyal mizhukake ni mitsák mutshuizha ne shuixa^c miñgatsegazháldixa niyó.”

Pélgamuxa zaldakuek kakbene

¹²Guñgueni ekí nakbeyá: “Guaklduge uldeñka Pélgamuxa nepananeke aksanekak ekí kalta agakauwa guwá:

Nas shezhá mushtabaña zaxa naxaldék ni ekí miñmeñkú.

¹³Naski mashi mizhekue nakualdi minuka. Mimijí kuíbulduki jisé sanegéñ zaldatshak jiaga, ijuldu naldakí nas za minkuanuge alduna nazishalga noshi na, ni mitsák ‘naldagálde nzha’ nakuagazhámine. Amak mimikenaña Antipaki, abá naldakí nas shalda namaklde guaxal za nuka nalgué, exa jisé sanegéñ zaldakueja akuaxa guatshak jiaga, naziyabá guazhámine.

^x 2.7 Gn 2.9; 3.22,24; Aux 22.2,14 ^y 2.9 2Kt 6.10 ^z 2.9 Gn 12.1-3; 17.1-14,19-20; Dt 10.14-16. Juldiú sanákueki Jatejaña ají kuíbuldu naldaldiamak kezhgakuxanane.

^a 2.9 Jñ 8.39-40,44; Alm 2.17-29; Ga 3.29 ^b 2.10 Aiki ubiyane awatualdiamak sáñkaldak izhalshuxa agaxeka janaña naldaldixa. ^c 2.11 Aux 20.14. Mutshuizha ne shuixaki guksé niwaga mayogakuexa makuatayakue zekldá.

¹⁴ Guatshak jiaga anuñka agatsalda nakldunazhé miyatshixa miñmeyaldikue: Ezuakueki mimikenañga Baldámja^d atshakue shizhixa nanamakga atshatogatshak jiaga tu nuxa miñguxa. Ejañki san zalda sáñkaldá Baldák Isayél shtukuakue kejudukshaldiamak aksanekldane. Ekíki jigaba akiyalzabiyaldixa ishkiyatenek axakuaxane axaldiamak, ekíga kauwisewá naldagálde na askuiledexaldiamak.^e ¹⁵ Ekibeñga na, ezuakue mimikenañga nikuldaitakueja^f [ni nauwa nakldunazhámakga] shizhiyamak atshatogatshak jiaga, tu nuxa miñguxá tuashakú. ¹⁶ Akna sha miyatshixa majiñga maja xaldeki nagakualdi miñgualdí. Ekí atshakí minaldaldíak, shezhá kaxak nakzuxaitixak ekí atshixakue ubañga kaukakshataldikue nzha.^g

¹⁷ Mieldeke kuxa miñkaldikueke Jatetshi Aldunaja nepananekue san san izhajuizhaldekakuek kakbeñká muldetua nuka guwíñ. Mieldeke kutám atshák agubiyal mizhukake Jateja ajíkué jékaldaxa zhinikga gakue kakaunanamak gakue mexane miñkauwaldikue.^h Ekibeñga na, nají miné mimawatualdiamak ezua jagi nóñgutse abutshi miñgexaldikue. Eñkán na abisa miñkazhuka akzuñguanuge ne, ai mipanaldixak za miñkué naldaldixa nzha.”

Tiatildaxa zaldakuek akbene

¹⁸ Guñgueni ekí nakbeyá: “Guaklduge uldeñka Tiatildaxa nepananekue aksanekak ekí kalta agakauwa guwá:

Nas Saldiñga netshi Jatetshi Asukuá, ubaki guksé nuñkua tuñgatse, kasaki shezhaxalda muldetua ishuwa guane jana tubá nagatsék ni ekí miñmeñkú. ¹⁹ Naski atshabinogauxa nakué, ekíga sakí zñjañgual minuka, alduna neshál minuka, minaxazauñka, jibañ tuabinogéñ abá náaldaki abeti mizhekue nakualdi minuka. Ekí kasak atshapanamine guashiñki akldéñga kaiga miyatshixá ni mimatuñkú.

²⁰ Guatshak jiaga ezua agatsalda nakldunazhé miyatshixa miñmeyaldikue: Mauzeñga munzhi Jesabélⁱ atshixa nanamakga atshixa munzhi miñgiteñga nuká, egabá tu nuxa miñguashá. Eñki ‘Jatetshi múldigaba naldiñga zuxaitshikuge nzhakú’ axeldaka. Ekí neshi na, naxazauñkakue naldagálde shi kaxaldiji, jigaba akiyalzabiyaldixa ishkiyatenek axakuaxane gakue, kauwisewá naldagálde na askuiledgakue nagaksanegatshakna kejudukshixa. ²¹ Akze, aldéñ sha atshixa majiñga maja xaldeki nagakualdinaldiamak jiaktuwi nagatokuge ne, amak atshasúñ

^d 2.14 Nm 22–25; 31.8–16 ^e 2.14 Ajsh 15.20 ^f 2.15 Aux 2.6 ^g 2.16 Eb 4.12; Aux 1.16. Shezhá jana ají múldigabak kaxañ kaxaldeki guaka guashi naldaka. ^h 2.17 Ex 16.4,14–16; Nm 11.7–9; Jñ 6.49–50. “maná” ⁱ 2.20 1R 16–21; 2R 9.22,30–37

akzeshi axautshi na askuuldexalga te tuashakú. ²² Akna ¡sai gualdikue mitu! Mulbatá akzeka sha nokshaldikue. Ekibeñga na, aldéñ na askuildek atshixakue zuxaita kakzukuá noshi guiyaba katuñshaldikue nakldá. Askimiñgaba munzhija sha atshá shi kaxaldiyane majiñga maja xaldeki naxakualdi akualdiakna ekí kagisalshazhaldikue. ²³ Ekibeñga na, mieldeki e tsukua atshakldegamak atshixakue guiyaba tuñshi guaxaldikue. Ai zhinik na saldiñga nepanaminekuañ san san mishjuizhaldekakuek ekí miñwashexaldixa: Nas za na muldetua miñzuziji, aldunaxa miñnegatogauxa, itshanabinogauxa mimatuñkuge. Ekibeñga na, ezua ezua sakí atshaminauxabé miñkatshaldikue nzha.^j

²⁴ Guatshak exa Tiatildaxa zalda minekuañ, mieldeke ekí naldagálde shizhiyamak atshakí noxabinukakuañ, jisétshi ‘akuagazhá guaneñka agatana shitiyanuge nakldá’ akuaká kagipanazhá guaminekuañki, akldé jibañ miñzukui ji atshakue miñmeyazhaldikue nzha. ²⁵ Egaba shi nagitiyamine zúnake izhikjuizhansha naldakíñga, nas naxaldikueñka yo amak atshál minoxaldí.

²⁶ Mieldeke kutám atshák agubiyal izhoshi na, atshakue mimajañgugamak atshijiñga sugaxá naxatshaminaldixakuañki, saldiñga saná nahauxa miyaksanexaldiamak niuwi miñgexaldikue. ²⁷ Ekíga na, Najateja kama na sanexaldikuamak shezhaxalda xálbalde naksuikuek muksú jana nuxa kakualgualdikue niuwi nagenamakbé,^k ekíga misanexaldiamak niuwi miñgexaldikue. ²⁸ Ekíga na, zumeya abutshitema^l muñzegapanatshak zalda miñgexaldikue nzha. ²⁹ Mieldeke kuxa miñkaldikueke Jatetshi Aldunaja nepananekue san san izhajuizhaldekakuek kakbeñká muldetua nuka guwíñ.”

Saldixa zaldakuek kakkbene

3 ¹ Guñgueni ekí nakbeyá: “Guaklduge uldeñka Saldixa nepananekue aksanekak ekí kalta agakauwa guwá:

Jatetshi Alduna kugua naldashiñga naksuikue, zumeya kugua naksuikuek ni ekí miñmeñkú. Naski atshabinogauxa nakualdi na, beñga minuka mimakuaka naldatshak, aldunaldiñki shuamine nakué. ² Akna uba zhikldéñsha, miyaki shuishí jana naki nauwa me miñgabaté nuká kama guksha guwíñ. Akze, Najate atshakue mimajañgouauxa axatshazhámíne ni mimatuñkú. ³ Akna sakí izhogakue shitiyamine, nukamine bezhgisekuakue, sha miyatshixa majiñga maja xaldeki Jatek agakualdini amak axatshapanakue. Akze, be nogakí minaldaldiák, tusheka miñkizhañkajamakbe

^j 2.23 1R 8.39; Jer 17.10 ^k 2.27 Sal 2.9 ^l 2.28 Aux 22.16. Aiki awabiyane shalda akldé kakzukualdiamak kaxatshaldixa guashi.

mitsák naxaldikue miñsúñ noxaldieñga guiyaba mimatuñshal miñkizhañkaldikue nzha.^m

⁴Guatshak Saldixa zalda minekuañ ezuaq nuxa na sha atshakuek nusa ishkazguazhá guaminekue ni mimatuñkú. Akna aikuañki nas nañga zhakuá abutshi minjua” izhominaka naldakldegamak za mizhekualdaldixa. ⁵Mieldeke kutám atshák agubiyal mizhukake, ekíga zhakuá abutshi minajualdiyaldixa. Gualdini minakuane izhoshiñga mizhoxaldiamak miñkazhukaki aldíbulduk^o axaldikue ni mitsák izhugakuagába, Najateja, aldéñ guaklde uldeñkakueja nukatoxaldiéñ ‘jejiéki nají giemi nzha’ mimakuaxaldikue niyó.^p ⁶Mieldeke kuxa miñkaldikueke Jatetshi Aldunaja nepananekue san san izhajuizhaldekakuek kakbeñká muldetua nuka guwíñ.”

Pildadelpiixa zaldakuek kakbene

⁷Guñgueni ekí nakbeyá: “Guaklduge uldeñka Pildadelpiixa nepananekue aksanekak ekí kalta agakauwa guwá:

Nas sha atshazhúge, janshizhe, namaklde naugék, sáñkalda Dabíja^q aldéñ sanegeñka juldunéñ zalda yabi aksuikuanega naksuikuek na, niya gualdikuake ni meja soñguazháka, soñgua gualdikuák ni meja niya akzegazháka naksuikuek ni ekí miñmeñkú.

⁸Naski atshabinogauxa nakué. ¡Tu guwíñ, juwí miñgakpenuge te nuká, ni meja miñkakyogazháka tuashibiná! Naldiñki auxa kama minsé naldatshak jiaga, nají múldigabaja guagamak atshiji, ni mitsák ‘naldagálde nzha’ nakuagazhámine. ⁹Akze, naldagálde zukuakakueki ‘juldíu sanákue na kaldá’ aldegatshak jiaga, aldunaldiñki ai naldagáldekue, jisé axazauwal izhajuizhaldekakueki miñkuldeji, exa mimisták akldé miñgazukualdiamak nuldu miñkayokshaldikue.^r Ekí katshishaldatshakna mimezhgajañguge kakwashekualdikue nzha. ¹⁰Guatshak jibañ tuabinogéñ abá náaldaki abetal nogakue miñmenugamak mizhuká shalda na, kagik káguba zhekuauxa guiyaba katuñshi kakuajaldiéñ ldiuwañ zegatshak, naski numañ mimatualdikue nzha.^s

¹¹Nas naki miñkaldeji na guapankú. Akna shi nagitiyamine izhikjuizhansha naldakí amak atshál minoxaldí. Ekíki janshibé naxatshamine shalda ubiyamine mimawatuñshi ezua janshizhe miñkatshaldikueki,^t ni meja miñgipanazháldiamak. ¹²Mieldeke kutám atshák agubiyal mizhukake, jékaldaxa juwí Najate izhukatshi juxasa jana mimakldokshaldikue. Exa za akldoshi

^m 3.3 Lk 12.39-40 ⁿ 3.4 Aux 19.8 ^o 3.5 Plp 4.3; Aux 20.12 ^p 3.5 Mt 10.32

^q 3.7 Is 22.22 ^r 3.9 Is 49.23; Aux 2.9 ^s 3.10 2Pe 2.9 ^t 3.11 Mt 16.27; 1Kt 9.25. Aiki sáñkaldak izhalshuxa agaxeka janañga naldaldixa.

na, akzuxaitakue tuabináta. Ek na Saldiñga netshi Jatega Najate axezhuka akzuñgualdikue. Ekíga na, Najatetshi kuíbuldu Jeldusaldeñ abisaki jékaldaxa Najate nugeñka zhinik zabaldixa^u axezhuka jiaga akzuñgualdikue. Ekibeñga na, abisañ axeltenuge jiaga akzuñgualdikue nzha. ¹³Mieldeke kuxa miñkaldikueke Jatetshi Aldunaja nepananekue san san izhajuizhaldekakuek kakbeñká muldetua nuka guwíñ.”

Aldauldiseyaxa zaldakuek kakkbene

¹⁴Guñgueni ekí nakbeyá: “Guaklduge uldeñka Aldauldiseyaxa nepananekue aksanekak ekí kalta agakauwa guwá:

Naski guakugamak isugakual nokuge, tuñgauxabe namaklde za guaxal nokuge. Saldiñga netshi Jateja gaune nahauxaki nas zhinik nalshapananek ni ekí miñmeñkú.^v

¹⁵Naski atshabinogauxa nakué. Aldunaxa tatshui miñzé ni sui miñzé naldabíne. Akze, sui miñzé azhi tatshui miñzé namimakuashíñki, akldé janshibé naminaka. ¹⁶Ne, sui ni tatshui miñzaldagálde, egaba jam nuxa miñzé minakna,^w diuwi nakzukui mimezhwangualdikue nakldá. ¹⁷Akbiñgaki, ekí nexabinogák: ‘Kabia na nakú. Nalgaba kabia neklduge, ni ji jiaga nagajuezhazhé nakldá’ mineka. Naldatshak ekí nuxa miné miñnegagálde: Namake zeñ naldabíne, ‘shkuna naldagálde ekí aldeká’ miñkajanka, nashi jika miñgajueshkakue, uba minsúñze, tubá miñgatsé nakldá. ¹⁸Akna ekí guiyaba miñmeyaldikue: Niuba guksék zuxaiti janshagatsekldde na, namak kabia minexaldiamake nakjabiyakue. Zhakuá abutshigaba mitshualdialdiamak nakjabiyakue, ekíki jiwabañ tubá miñgatsé izhoxabiñsánaldiamak.^x Uba minsúñzekue nak, mizutualdiamake aldimediau ubak mizhbexaldixa nakjabiyakue.

¹⁹Nas mielde izhgajañgugeki ‘ekí atshasúñze ni matú’ axaldeshi, jian naldaldiamak guiyaba akizhakuge naldashakú.^y Akna sha miyatshixa majiñga maja xaldeki aldunaxa zhinik nagakualdi guakue miñgatsaldashá. ²⁰¡Tu guwíñ, naski jugátezshak akté minkauldá na nokú! Akna mieldeke nalduka xaldeki juwí nagakpe miñgualdiakue, juldunaldikuenik maiñ na ishkalaldeshi zakualdixa nzha.

²¹Mieldeke kutám atshák agubiyal mizhukake ekí miñkatshaldikue: Nas ubiyá guñgukueni Najate na sanexaldikuamak ají sanexa xalдохék yatenugamakbe, nas na misanexaldiamak yaldagakue niuwi miñgexaldikue. ²²Mieldeke kuxa miñkaldikueke

^u 3.12 Aux 21.10 ^v 3.14 Jñ 1.3; Kls 1.16,18 ^w 3.16 Aldunaldiñki mozhua akldeshi na, Jate za jañgualdixa azhi jañguazhaldixa izhgakugazhé guashi. ^x 3.18 Aux 7.14; 19.8 ^y 3.19 Pr 3.12; 1Kt 11.32; Eb 12.6

Jatetshi Aldunaja nepananekue san san izhajuizhaldekakuek kakbeñká muldetua nuka guwíñ.”

Jékaldaxa zütune

4 ¹Ekí kalta gauwakue nakbeyatoguenik, tua nakzegagá jékaldaxa jugaxé jana akpezhane te tualdatshake, tata negamak múldigabaga neshi naxazakuagaté nukanugejañga^z mokue ekí nakbeyá: “Jexa iyabexa guwá. Kaiga zhinik zegakuamak zexaldixa nubatuñshí.” ²Ekí nakbeyatshaga Jatetshi Alduna naksaneshi aldunaldiñki tua nakzegagá jékaldaxa sanexa xaldoxé te tualdatshak, ezuañki eñkáñ ité tu. ³Eñki jagi níkuitikue^a tubá stuñka janamé abezhuka. Guatshake sanexa xaldoxéki ezua jagi níkuiti^b tuñgatse zuzué me yo ibekueki tubá stuñka na naldá.^c ⁴Ai nogeñga na, 24 agatsalda sanexa xaldoxékuega me yo ibateklde teté nogatshake, eñkañga 24 duebakue iteté na noxá. Ekueki zhakuá abutshigaba ijuakue naldekue na sáñkaldake niuba ijiukuekue.^d ⁵Sanexa xaldoxé akldé akzexa zhiniki kuizhbañgui negatshak tubá tubá atshiji, akauldaté nukaldatshak, sanexa xaldoxé stake kugua muñshí pulkakue juna juna puldaté tu. Ekuega na Jatetshi Aldunaga kugua naldashiñga ne.^e ⁶Sanexa xaldoxé stakki níbuni tuñgatse níkuiti janagatse tubá stuñkaga ka agatsé akbá tu.

Sanexa xaldoxé noxeñkaga na, makaiwa benekue agatsauxa ubaga ka ikuekueki maxáiñtaba axakldukakue tu. ⁷Kasakldeki nabi tuñgatse. Mozhuaneki bue tuñgatse. Maiguaneki káguba tu waxa izhuka. Makaiwaneki wizhá mataxa mizhá nogatshak agatsamak agatsé. ⁸Ekí agatsekue na, ezua ezua aldahauxa tezhuwa agikalda axaldikuekue agikalda bakaldak, agikalda sukldi ubaga ka ikuekue. Ekueja na izhgasekua náaldaki ekí zañga guaxal nukakue:

“Saldiñga netshi Jate, nauwijí Sáñkaldá maldé,
Mañki sha atshabálde, janshizhe, janshizhe, janshizhe za maldé.
Mañki auxaga kama mixaldé, saldiñga miksuikuegaba ni maldá.
Mañki izhoshiñga naxabaldogamakga kaiga mizhukaga,
niuwizhíne jiaga izhoshiñga mizhogataná.”

⁹Ekí izhoshiñga izhogataná sanexa xaldoxéxa ité noxék agabeyatoshi na, akldé akzamakga agazukui, akaldak akzamak axabeti, “zeñ nzhakldék” agabeyal za alduka. Ekí axajanashatshake, ¹⁰24 duebakuejañki sanexa xaldoxéxa izhoxé izhoshiñga izhogataná stak akldé akzamakga agazukualdiamak nuldu axayoshi na, sáñkaldak kejiukueki ildu, astaxa ite akuí ekí agabeyaldá:

^z 4.1 Aux 1.10 ^a 4.3 Aikueki ezuañki “jaspe” azhi “diamante”, ezuañki “cornalina” azhi “rubí”. ^b 4.3 “esmeralda” ^c 4.3 Ez 1.28 ^d 4.4 Ekí sáñkaldak niuba ijiukuekueki kutám atshák agubiyaneke awatualdiamak ijiukuekue. ^e 4.5 Aux 1.4

11 “Nauwijate, nauwijí Sáñkalda maldé, ma za ekí mikbeyakue ze:
 ¡Ma na akaldak akaldak mikzé nibaldá,
 Ma za akaldak mikzahamak mixabeta ipanamildaka nibaldá,
 Ma za saldiñga jika na nahauxa maksaneka nibaldá!
 Jinake naldakí. Ma za saldiñga jika na nahauxa gaumalde,
 Ma majañguamak za jika gaumaldekueki amak naldal za
 nogatuka nak.”

Jubeju zhauwa janane

5 ¹Ekí tuatogukueña sanexa xaldoxéxa ité noxeja jibatshaldi mual kalta makue mushtabaña akzukue kugua juizha ishkatsuñguane aksuí tu. ²Ekí tualdatshake Jateja guaklde uldeñka ezua matshuwi kama axaldejañki saldiñgaja aldukaldiamak jaldáñ ekí guagaté nuká: “¿Meja jalde kalta ishkatsuñguaneki ishkawatiya niuwi axaldé naldaldixa ne?” ³Guatshak ni ezua jékaldaxa, ni kagik, ni kagi sukldi zaldaja jiaga kalta ishkatsuñguane ishkawati xaldeki tu guaka naldakí na naldá.

⁴Ni meja kalta ishkatsuñguane ishkawati xaldeki tu guaka niuwi axaldé naldakí naldák, naski itshani mauwiñgaba ⁵guatogukueñki, ezua duebajañki ekí nakbeyá: “Akldé mauwagába. ¡Tu guwá! Judá ldxexa nabi sáñkalda nahamakbe saneka,^f sáñkalda Dabí zhinikga nakldeki ubiyá guane.^g Akna eja zúnake kalta kugua juizha ishkatsuñguane ishkawatiaka nakldá.”

⁶Nakbeyatshake ekí tu: Ezua jubeju zhauwa^h Jatek axakuaxa guanane tuñgatse sanexa xaldoxé staxaga, makaiwa benekueja, 24 duebakueja iyabateklde kenaxaga akté tu. Eñki kugua katshuⁱ aklduka, kugua uba ikué naldatshak, ubaki Jatetshi Alduna kugua naldashiña ne kagi agatsauxa axaxanega.^j ⁷Gueni Jubeju zhauwaja sanexa xaldoxéxa ité nukak axaldeyeniki etshi jibatshaldi mual kalta ishkatsuñguane aksuikualdé ipaná. ⁸Amak ipanatshaga na makaiwa bene naldekueja, 24 duebakue naldekueja jiaga Jubeju zhauwa akldé akzamakga agazukualdiamak nuldu axayogatshak, jika azabeñshi jiba agabeñka^k kaksuikuegaba, jaldu niubakue we juma izhuka jialda akué kakldukagaba. Ai we juma izhukaki Jatetshi nekldekueja Jate axazguagatuka guashi.^l ⁹Gueni abisa zubeya Jubeju zhauwak ekí axazabeyaldá:

“Ma za na jalde kalta ishkatsuñguane ipana xaldeki ishkawatiya niuwi mixaldé.

^f 5.5 Gn 49.9-10 ^g 5.5 Is 11.1,10; Alm 15.12; Aux 22.16. Judá ldxexa nabi, Dabí zhinikga naklde akuakáki Jateja ezua zúnekualdal galaldixa guakldanega. Eñki Duwe Jesúsga nzha.
^h 5.6 Ex 12.1-13; Is 53.7; Jñ 1.29. Eñki Duwe Jesúsga guashi. ⁱ 5.6 Katshuki ubiya kama axaldé guashi. Kugua guagatshak auxaga ubiyaka guashi. ^j 5.6 Zac 3.9; 4.10; Aux 1.4
^k 5.8 Neh 12.27. “arpas” ^l 5.8 Sal 141.2

Jinak niuwi mixaldé naldakí. Mañki makuagatshak mijí abi
mikzuldatshakna,
saldiñga kuíbuldu zaldakue, saldiñga sanákue, saldiñga sha sha
zukuaxa saná na nahauxa nekue zhinik
Jatetshi aldaldaldiamak kesabímalde nak.^m

¹⁰ Ekibeñga na, Nauwijateja za kaksaneshi, e za axazauwi
múldigaba agaskaitshatoxaldixakue kaldekshi,
kagik zhekuekue agasanexaldixa ketemalde nak.”

¹¹ Ekí axazabeyatshak mokue tualdatshake, matshuwi Jateja guaklde
uldeñkakue sanexa xaldoxé, benekue, duebakuek me yo iyabateklde
tualdatshake, aikueki matshuwi izáatasa, guáagasa zalda aldaldiⁿ
azabeyaté nukaldatshak, ¹² ekí jaldáñ azabeyaté nuká:

“Jubeju zhauwa Jatek maxakuaxanane maldé, ma za ekí mikbeyakue ze:
¡Ma na saldiñga jika na nahauxa maksaneka nibaldá,
Ma za kabia ldexa na nahauxa miksuikue nibaldá,
Ma za auxaga mishkué maldé nibaldá,
Ma za auxaga kama mixaldé nibaldá,
Ma za akaldak mikzahamak mixabeta ipanamildaka nibaldá,
Ma za akaldak akaldak mikzé nibaldá,
Ma za saldiñga zeñ zalda mikbeya ipanamildaka nibaldá!”

¹³ Axazabeyatogatshak saldiñga Jateja gauwá guanauxa alnobaldi,
kagik, kagi sukldi, níbunildi zhe nogauxa nekue ekí azabeyaté nuká:

“¡Ma sanexa xaldoxéxa ité malduká, ekíga na ma Jubeju zhauwaga
maldé,
Ma na saldiñga zeñ zalda mikbeya ipanamildaka nibaldá,
Ma za akaldak mikzahamak mixabeta ipanamildaka nibaldá,
Ma za akaldak akaldak mikzé nibaldá,
Ma za saldiñga jika na nahauxa maksaneka nibaldá!
¡Ekí za naldiñga shi maldaldataní!”

¹⁴ Ekí axazabeyatshake makaiwa benekuejañki “¡Ekíga shi naldí!”
ayokuatshak, ²⁴ duebakuejañki [ega izhoshiñga izhuka] akldé
akzamakga agazukualdiamak nuldu axayó guaté tu.

Kalta ishkatuñguane ishkwatipayanane

6 ¹ Guñguenik tuaté nogukueñga, Jubeju zhauwaja kalta kugua
juizha ishkatuñguane naldé ezua zeñ ishkwatí. Ishkwatiatshake
exa makaiwa benekue, ezuajañki kuizhbañgui negamak ekí guagaté
nuká: “¡Nak guwá!” ² Nukaldatshake tua nakzegagá ezua kabayu
abutshi izhañkatshake, aik ité neyatoxeki kalbezhá, sɔza aksuí tu. Eñki
sáñkaldak izhalshuxa iyajiuñguake ubiji, ubiyalga noxaldiamak neyaldá.

^m 5.9 Eb 9.12; 1Pe 1.18-19 ⁿ 5.11 Dn 7.10

³Guñguenik Jubeju zhauwaja kalta ishkatsuñguane mozhua zeñ ishkawatiyatshake, exa makaiwa benekue, mozhuanaja: “¡Nak guwá!” guagaté nuká. ⁴Gualdatshake jiak ezua kabayu atsushi izhañkatshake, aik ité neyatoxeki shezhá atema agaxegatshak, kagik señgaba zhe noxa iwatiyaldiamak, káguba kauzhikshishi ataba atabañ akuaxa akuaxá gualdiamak niuwi agaxé.^o

⁵Guñguenik Jubeju zhauwaja kalta ishkatsuñguane maigua zeñ ishkawatiyatshake, exa makaiwa benekue, maiguaneja: “¡Nak guwá!” guagaté nuká. Gualdatshake ezua kabayu abaksu izhañkatshake, aik ité neyatoxeki gakue guashixa aksuí neyapanatshaga, ⁶makaiwa benekue mitakuañ zhinik ekí akuaká nuká: “Atiuwiñ kasa izhaxauwatshak atiuwiñ gashi me ajabiyaka.^p Azhi aguáñ akzeki maikldiuwi gashi ajabiyaka.^q Naldatshak mantixa, kalwéldia siyagaxaune nañki nusakuagába.”

⁷Nukañgukuenik Jubeju zhauwaja kalta ishkatsuñguane makaiwa zeñ ishkawatiyatshake, exa makaiwa benekue, makaiwaneja: “¡Nak guwá!” guagaté nuká. ⁸Gualdatshake ezua kabayu kakshikuamajãngatse izhañkatshake, aik ité neyatoxeki “Shuixa” axezhuka naldatshak, shuanekue ipankaki eñkañ agapa aldiwan nagaté tu. Aikueki káguba kagik zhekuauxa maxáiñtaba naldé ezua naldashiñki^r makuashi mual makuák, azhi maldi makuák, azhi mulbaták, azhi béyakze sha makuakuekuek kakuaxaldixa niuwi agaxé.

⁹Guñguenik Jubeju zhauwaja kalta ishkatsuñguane jatshiwa zeñ ishkawatiyatshake, exa Jatek jika akiyayoka staxaki Jatetshi múldigabaja guagamak akuák za aldogué shalda kakuaxa guananequetshi aldunakue tualdatshakna, ¹⁰jaldáñ ekí agabeyá: “Saldiñga netshi Sáñkalda, auxaga maksaneka, sha atshabálde, janshizhe, namaklde za matshixa, ¿mitsá jituakualdixa ne? Kagixa zhekuekue sakí abi baxé zúnakuaxane shalda, ¿mitsák kagatsaldi ne katuwi guiyaba katuñshi kabakiyushaldixa ne?”^s ¹¹Agabeyatshake ezua ezua zhakuá abutshigaba kagaxegueniki ekí kagabeyá: “Aldunaldiñki mimikaja maiñ juizhiñga Jate axazauñkakue mimijanameña kakuaxaldixa janakagatunauxa kakuagagáñgaki, nauwa maldeña jitualga minoxaldí.”

¹²Guñguenik Jubeju zhauwaja kalta ishkatsuñguane tezhuwa zeñ ishkawatiyatshake, kakshata atemajañ neyaldá, guatshake niuwiki abaksu ituane jana agatsé za ité nek.^t Guatshake saxaki abi jana atsushi za ité nek. Ekí tualdatshake, ¹³múlkaldaja kalwé kamakualdi mugatshak

^o 6.4 Mt 24.6-7 ^p 6.6 Aiki 1 “kilo” pañ sezheka “trigo”. ^q 6.6 Mt 24.7. Aiki 3 “kilo” pañ sezheka “cebada”. Ekí guagatshake gakue naldaksánalda guxá shalda guaja me migaxauwakue naldaldixa guashi. ^r 6.8 “1/4” Maxáiñtaba zhikbenane nauwa iyakuxanegaba negatshake, ezua zhikbenalda naldashiñki iyakuxá guane guashi. ^s 6.10 Dt 32.43; Sal 79.10 ^t 6.12 Is 13.10; Jl 2.31; Mt 24.29

akukagáldega aktiñguamakbe, zumeyakueki alnobaxa zhinik kagildi aktiná.¹⁴ Guatshak alnobaki kalta manamakbé manatshake tuasá. Saldiña gexákue, kagi nóñgutse níbunixa izhuka naldekueki izhogéñ zhinik axajuekuanegaba na nexá.

¹⁵Ekí zegatshakna saldiña kagik sáñkalda sanekakue, akzé axajankakue, suldáu agatsetshi sáñkaldakue, kabiakue, kama axaldekue, saldiña nashi, nashi naldagáldekue juizhi jakateldiñgabá, gexá steldiñgabá, jáguxa sukldi aldakuishi, ¹⁶guinuekuek, jáguxakuek ekí axaldexaldá: “¿Zunetina, zunetshuaksha guasé ne?” Ekíki sanexa xaldoxéxa ité nuká zunatuwi guakuak, Jubeju zhauwa kaxañ atemajañ guiyaba ni zunatuñshinék. ¹⁷Akze, kaxañ atemajañ guiyaba mawatuñshakué ldiuwañ akldañká guatshak, ¿meki ekí zegatshak abeti ité noxaldixa ne?”^w

Jatetshi aldé atualdiamak agazuñguanekue

7 ¹Ekí tuatogukuenik ekí jiaga tu: Kagi maxáiñtaba izhgekuauxa Jateja guaklde uldeñkakue makaiwa akteté tu. Aikuejañki múlkalda maxáiñtaba ixekue kagik, níbunik, ni ezua kaldik izheyazháldiamak juaxaldiyane te. ²Tualdatshak jiak Jateja guaklde uldeñka mokue ezuañki niuwi nañkajaldi zhinikga nitshigaté tu. Eñki Jate izhoshiña izhukatshi za aldé atualdiamak káguba akzuñgualdixa aksuikue. Naldeja ai makaiwa Jateja guaklde uldeñkakue kagi, níbuni sha gualdiamak niuwi agaxenekuek ekí jaldáñ kakbeyá: ³“Kagi, níbuni, kaldi sha guagába jiaktuatēnga nogwíñ. Kaigabeñki Nauwijate axazauñkakue etshi za nekue atualdiamak sugáxaldak akzuñgua gakuatshak za na amak atshabiñkuká gualdixa niyó.” ⁴Nukaldatshak amak agazuñguanekue mitsá ne nukaldatshak, aiki 144.000 saldiña Isayél^x tsukuakue ldaxegaba agazuñguane: ⁵Judá ldaxe zhinik 12.000, Aldubén ldaxe zhinik 12.000, Gad ldaxe zhinik 12.000, ⁶Asél ldaxe zhinik 12.000, Neptaldí ldaxe zhinik 12.000, Manasé ldaxe zhinik 12.000, ⁷Simehón ldaxe zhinik 12.000, Aldebí ldaxe zhinik 12.000, Isakál ldaxe zhinik 12.000, ⁸Sabuldón ldaxe zhinik 12.000, Jusé ldaxe zhinik 12.000, Benjamín ldaxe zhinik 12.000 agazuñguanekue.

Zhakuá abutshi ijuakuekue

⁹Ekí tuñgukuenik tua nakzegagá, káguba izáatasa zhikzhe saldiña kuíbuldu zaldakue, saldiña sanákue, saldiña sha sha zukuaxa na nahauxa sanákue zhinik ajuizhaldeklde sanexa xaldoxé staxa, Jubeju

^u 6.13 Is 34.4 ^v 6.16 Is 2.10,21; Os 10.8; Lk 23.30 ^w 6.17 Jl 1.15; 2.11; Nah 1.5-6; Sof 1.14-15; Mal 3.2 ^x 7.4 Gn 32.28; 35.22-26. Isayélki Jakópoga 12 sukua axaldé.

zhauwa nugaldi mual zutuwiñgaba akteté tu. Ekueki zhakuá abutshi ijuakuekue, káuxaldake setábaxe xai^y kaksui, ¹⁰jaldáñ ekí akuák:

“Nauwijate, sanexa xaldoxéxa ité malduká,
Ma Jubeju zhauwaga maldé,
Maiñ zunekualda miñsuikue nzha.”

¹¹Akuagatshakna saldiñga Jateja guaklde uldeñkakueki sanexa xaldoxék, duebakuek, makaiwa benekuek ibatekldekue akteté tu. Ekí noxekueja sanexa xaldoxé stak Jate akldé akzamakga agazukualdiamak ishkejiezhi nuldu axayoshi, ¹²ekí akuaxaldá:

“¡Ekíga shi naldí!
¡Nauwijate, ma na saldiñga zeñ zalda mikbeya ipanamildaka nibaldá,
Ma za akaldak akaldak mikzé nibaldá,
Ma za auxaga mishkué maldé nibaldá,
Ma za auxaga ‘zeñ nzhakldék’ mikbeya ipanamildaka nibaldá,
Ma za akaldak mikzahamak mixabeta ipanamildaka nibaldá,
Ma za saldiñga jika na nahauxa maksaneka nibaldá,
Ma za auxaga kama mixaldé nibaldá!

¡Ekí za naldiñga shi maldaldataní! Ekíga shi naldí.”

¹³Ekí nukaldatshake exa 24 duebakue, ezuajañki ekí naklduka: “Jaldekue zhakuá abutshi ijuakuekueki, ¿mekue shi na? ¿Mani zhinik nakldekue shi na?” ¹⁴Nakldukañguake, “duwe, mañki mikuega ne ekí nakldukashibaldá” akiyokuñgukuake ekí nakbeyá:

“Ekueki zuxaita zalda guiyaba atuatógēñ^z zhinik aldakldekue;
kauwijí zhakuáki Jubeju zhauwatshi abik ishkiyajizhatshak^a
ishkiyabutshekuane.

¹⁵Ekí zhinik na, Jatetshi sanexa xaldoxé stak akté nukakue, juwí Jate izhogaldi axazauwal zañga nukakue.

Akna Jateja numañ katualdiamak aldéñ izhogaldiñga kezhokshaldixa.

¹⁶Akna akldé maldija kakuazhíta, akldé ni kakldunazhíta, ni niuwija akldé zuxaita guañgua kakzukuaksáni, shañga kakzukuazhíta.^b

¹⁷Jinake naldakí. Jubeju zhauwa sanexa xaldoxé staxa akldukaja, jubeju numañ atuamakbe numañ katuwi kaksaneshi na,^c izhoshiñga mezhokshakue ni nañkajeñka kauldeyaldixa nak.^d Ekíga, Jateja akldé abauwazhaldiamak

^y 7.9 Jñ 12.13. Setábaxe xaiki sáñkaldá muldetua iyapanká atuñshi, jue jue axajanashishixa. ^z 7.14 Dn 12.1; Mt 24.21; Mlk 13.19 ^a 7.14 Eb 9.14; 1Jñ 1.7; Aux 1.5; 22.14 ^b 7.16 Sal 121.5-6 ^c 7.17 Jñ 10.9-11 ^d 7.17 Is 49.10; Jñ 4.14; 7.37-39; Aux 21.6; 22.17

ubaldiá kakldogauxa kexañgualdixa nakldá.^e”

Kalta ishkatuñguane kugua zeñ ishkwatiane

8 ¹Ekí tuatogukuenik Jubeju zhouwaja kalta ishkatuñguane kugua zeñ ishkwatiyatshake, jékaldaxaki egaba asunék gueni nauwa aauxa^f zek.

²Zegueni tu gualdatshake Jateja guaklde uldeñkakue kugua, Jate izhogaldi mual zutuwi akteté noxekue kugua tata kagaxé. ³Guñgueni Jateja guaklde uldeñka jiaq mokue ezuañki we juma izhuka ayoka guksé akué niubaga akte nagueni, sanexa xaldoxé buan Jatek jika akiyayogéñ niubaga nuká stak akté nogueñki, we juma izhuka yoxaldixa matshuwi agaxé. Ekíki exa akiyogatshak, Jatetshi nekldauxakueja axazakuaklde nañga Jatek agexaldiamak. ⁴Guñgueni we juma izhukatshi ajuma, Jatetshi nekldekueja axazakuaklde nañga, guaklde uldeñkatshi káuxaldak akldoguék zhinik Jate nogéñ axalditshixaldá. ⁵Guñguenik Jateja guaklde uldeñkaja Jatek jika akiyayogéñ zhinik guksé kuiti ai akldoguék suñguñgueniki kagildi uteyatshake, kuizhbañgui negatshak tubá tubá atshiji, akauldi, kakshata juizhi ne.

Tata axazajuine

⁶Gueni kugua, Jateja guaklde uldeñkakue tata agaxenekuega axazajuixaldiamak janazhigatú. ⁷Guñgueni Jateja guaklde uldeñka kasakldeja tata agasjuigatshake núgalda, guksé na, abi juizhi zhikbateklde kagildi awateyá. Guatshake kagik, kaldi maiktaba naldé ezua naldashiñki^g puldatshake kaldáki nuk puldá.

⁸Guñguenik Jateja guaklde uldeñka mozhuaneja tata agasjuigatshake, guinue atema janagatseki juna juna puldi níbunildi akuateyá. Guatshake níbuni maiktaba naldé ezua naldashiñki abildia za akbá negatshake, ⁹níbunildi bene agatshekue maiktaba naldé ezua naldashiñki shuizhá. Ekibeñga na, anuñka naldashiñga balkukue naldaksánsha.

¹⁰Guñguenik Jateja guaklde uldeñka maiguaneja tata agasjuigatshake, ezua muñshí pulka jana zumeya zuxaita atema juna juna puldi alnobaxa zhinik akjienatshak, ninakue maiktaba naldé ezua naldashildi akjienatshak, ni nañkaxakuek jiaga akjiená. ¹¹Guatshake zumeya akjienaneki “Kakuakze”^h axezhuka naldeja na ai nikue maiktaba naldé ezua naldashiñki kakuakzegaba za nekshatshak zhinik na, matshuwí káguba shuizhá.

¹²Guñguenik Jateja guaklde uldeñka makaiwaneja tata agasjuigatshake niuwi, saxa, zumeyakue maiktaba naldé ezua naldashiñki

^e 7.17 Is 25.8; Aux 21.4 ^f 8.1 “1/2 hora” ^g 8.7 “1/3” ^h 8.11 “Ajenjo”, eñki ezua kaldá suldimáñ kakuakze.

nusaldegatshake, eñki tuañ itsék guane abá. Guakna atiuwiñ, atseñ zekáki maiktaba zhikbenane jana noxé ezua naldashiñki muñshí azatuaksá.

¹³Guñgueni mataxa stualdatshake wizháⁱ mizhatuka jaldáñ ekí negaté nuká: “¡Wau wau wau, wau wau wau, wau wau wau! Kagik mizhekue, Jateja guaklde uldeñkakue maigua juezhatukakueja tata naki agazajuishi guatukakueja agazajuigatshak, ¡mitsá guiyaba mitualdixa ne!”

9 ¹Ekí tuatogukuenik Jateja guaklde uldeñka jatshiwaneja tata agasjuigatshake, mokue ezua zumeya alnobaldi zhinik kagixa akjienanega tu. Aiga na sehuldútshi yabi agaxeguake ²amak soñguá. Akpegatshake sehuldúni zhinik ijiáxaldaki guksé atemajañ puldatogaldi zhinik jana iyabeshi, aiga tiñ zegatshake niuwi, múlkalda tuañ itsekuá. ³Guñgueni ijiáxaldak zhinikga shizhikue kagi agatsauxa aktinatshake,^j zekú makakuamak sha ajanashaldixa niuwi kagaxegatshak ⁴ekí kagabeyá: “Saldiñga kaldá, kaldí, katuldá agatsekue, sha guagábaki askimiñgaba mielde káguba Jatetshi nekue atualdiamak sugáxaldak agazuñguazhánekue^k za na sha miñgualdí. ⁵Guatshak kakuaxaki guabináldi, egabá zuxaita zalda guiyaba katuñshi, zekú makane mikzukuakuamak kakzukuá jatshiwa saxa minoxaldí.” ⁶Atshakna káguba shuikldana kakzeshi, shuixa aldiyatshak shuixaki kagajuezhane noxaldixa nak, ni sakí shuixa kakzaldazhaldixa.

⁷Guatshak shizhikueki ekí agatsekue tu: Kabayu kaukshal ite awaldeyaldixa siyagaxaune tuñgatsekue, sáñkaldake niuba izhalshuxa janagatse ijiukuekue, waxaki káguba tuñgatsekue. ⁸Saiki munzhitshi janagatse kezshukakue, jualdaki nabitshi tuñgatsekue, ⁹tabáxaldake shezhaxalda tuñgatse ipakue. Gikaldaki matshuwi kaldu^l janagatse kabayukuek akldi naldaji kaukshal awaldeyatshak ishkaldegamakbé ishkaldeka. ¹⁰Nugiki zekútshi janagatse aklduka, asugaxaki makakue izhikuekue. Eñkáñ na jatshiwa saxa káguba guiyaba katuñshá noxaldixa niuwi agaxenekue. ¹¹Ekue aksanekaki guaklde uldeñka sehuldú aksuikuega. Eñki ebeldeyuke Abadón, galdieguke Apoldiñ axezhuka.^m

¹²Ekí zegatshake wizhája “wau wau wau, mitsá guiyaba mitualdixa” guaklde kasakldeki amak zek. Guatshak atualdixa mozhuaña juezhaté nakldók.

¹³Guñgueni Jateja guaklde uldeñka tezhuwaneja tata agasjuigatshake, Jate buan aldéñ jika akiyayogéñ niubaga maxáiñtaba asuxa aklduka naldéñ zhinikga múldigaba nuká. ¹⁴Ai múldigabake tezhuwane Jateja

ⁱ 8.13 Mauzeña zalda Jatetshi múldigaba sezhekldék ezuakuejañki “Jateja guaklde uldeñka” guaka. ^j 9.3 Jl 2.1-11 ^k 9.4 Aux 7.2-3 ^l 9.9 Ajsh 8.28. Akldé migajienaldiamak guageñka niyakue. ^m 9.11 Ekí axezhukakueki “makldañgashakue” guashi.

guaklde uldeñka tata aksuikualdék ekí agabeyá: “Guaklde uldeñka makaiwa nekue ninatema Éhupaldatexa shaklduka axaldikuekue shakjui guwá.” ¹⁵ Guñguake guaklde uldeñka makaiwa nekue ai kagiañ, ai saxak, ai niuwañ, anuñka zegatshak ajanashaldixa janakagatunalguamak, káguba kagik zhekuauxa maiktaba naldé ezua naldashiñki akuaxaldiamak keyabesá. ¹⁶ Atshaga na, matshuuwi kaukshaldixakue kabayuk ite tualdatshak, mitsá ne nukaldatshak, aiki 200 miyón.

¹⁷ Ekí kabayukue aldunaldiñga tualdatshak kabayuk ite neyatoxekueki tabáxaldak shezhaxaldaga guksé jana atsushi, ezuañki níkuitiⁿ jana atashi, ezuañki kakshikuama jana agatsé^o ipakuekue tu. Kabayutshi sáñkaldaki nabitshi sáñkaldá tuñgatsekue, kaxake guksé, ijiá, asúpalde^p akzaxaitshixa. ¹⁸ Ai maigua nalda migisalshá guakuekueki guksé, ijiá, asúpalde kabayuja kaxak akzaxaitshéñ zhinik na, káguba kagik zhekuauxa maiktaba naldé ezua naldashiñki nuk kakuaxá. ¹⁹ Akze, kabayutshi kamaki kauwijí kaxakga ekí kama axaldekie, naldatshak nugixa jiaga kama axaldekiega. Nugiki takbi janagatse ne, jiak takbitshi sáñkaldá janagatse izhikuekueki sha makuakuekue.

²⁰ Guatshak mieldekieki ekí migisalshá guakuekueja guagazhá guane naldeki, ai zhinik jiaga sha ajanashixa ni nauwa majiñga maja xaldeki Jatek axakualdi akuazhá. Ni jisétshi aldunakue akldé akzukui mual axatshá abaja guazhá, ni jigaba akiyalzabiyaldixa ishkiyatenekue niuba^q sezhekldekue, jagi sezhekldekue, kaldiga sezhekldekue, aikueki ni stuazhákakue, ni ji nukazhákakue, ni neyazhákakue^r jiaga akldé akzukui mual axatshá abaja guazhá. ²¹ Ekíga na, káguba guaxa atshá, awaldintik atshá, kauwisewá naldagálde na askuiledxa, abúa na atshá guasúñzamak atshá, ni tushexa abaja guazhá.

Kalta nóñgutse tune

10 ¹ Ekí tuatogukuenik Jateja guaklde uldeñka, mokue ezua matshuwi kama axaldé jékaldaxa zhinik mauwik makue zabaté tu. Sáñkaldake zuzué ibekue, waxaki niuwi jana stuñka, kaldakueki guksé nuñkua izhgaldagamak agatsé. ² Káuxaldake kalta nóñgutse makue sonane akpa, akjienatshake kasa jibatshaldiñki níbunixa staná, jibatshazhaldiñki kagixa staná. ³ Gueniki nabi kauldamakbé jaldáñ kauldatshake kugua kuizhbañguikue jiaga zukuák. ⁴ Ekí zukuagaté nukaldatshak, ai jiaga kaltak gauwexañ atshapanaldatshake, jékaldaxa zhinikga múldigaba ekí nagabeyaté nuká: “Kugua kuizhbañguikue zukuakldeki gauwagába. Egabá mikshá nuxa shi noshí.”

⁵ Gueniki Jateja guaklde uldeñka níbunik, kagik agaldagaté tunuge nalgueja káuxalda jibatshaldi mual jékaldeldi izhgaldakshiñguenik ⁶ ekí

ⁿ 9.17 “jacinto” ^o 9.17 “ ‘azufre’ jana” ^p 9.17 Aiki zúxaita tatshuakzeshi pulka.
^q 9.20 “oro, plata, bronce” ^r 9.20 Sal 115.4-8; Dn 5.23

axelté: “Jate izhoshiñga izhogataná, alnoba, exa jika itshé nogauxa, kagi, jika zhe nogauxa, níbuni, eni jika agatshé nogauxa gaunega natuaté nogéñ ni ekí guakú: ¡Auxa zek guakna akldé jituakue naldaksá ni gu! 7Akze, Jateja aldéñ axazauwi ají múldigaba naldiñga zuxaitshixakuek sakí atshaldixa kakbeyatogatshak sakí guashi mu kagisekuazhá guanane, aldéñ guaklde uldeñka kuguaneja tata agasjuixaldixa ldiuwañ zunake auxaga isugakualdixa nzha.”

⁸Guagatsshake jékaldaxa zhinik múldigaba nukanalgukuejañga mokie ekí nakbeyaté nuká: “Guaklde uldeñka níbunixa, kagixa stanane akté nukák kalta nóñgutse makue sonane akpá nuká ikugate guwá.” ⁹Guake aldesaxa neñgukuenik kalta nóñgutse nagegakue akshishiñgukuake ekí nakiyó: “Ake, nazikuxa xaldeki ga guwá. Makatshake kaxake jatiá jana maldiwi míkzukualdinik dzhizhaxaki kakui míkzukualdixa niyó.”

¹⁰Nakbeñguake amak kalta nóñgutse ikugukueniki ga. Gualdatshake kaxake jatiá jana maldiwi nakzukuane nalgué, dzhizhaxaki kakui nakzukuá. ¹¹Gueniki ekí nagabeyá: “Matshuwi kuíbuldukue, sanákue, sha sha zukuaxa sanákue, sáñkaldakue shalda Jatetshi múldigaba naldiñga zuxaitshalga nogakue migatsaldaldixa nzha.”

Mozhua sigí namaklde za guakakue

11 ¹Guñguenik abaldaxá shkaldá nagaxegatshak ekí nagabeyá: “Zhiksha xaldeki juwí naxazakuagaldi, jika nakiyayogéñ mitsá agatsé guasha^t xaldeki mitsá káguba akldé nakzamakga nakzukuak zhekuekue izata guwá. ²Guatshak jubaldaxa jueyáñ zeñka zunake guashagába. Jinake naldakí. Aldiñki juldiú saná naldagáldekuek kakiyakbé guanuge nak. Akna kuíbuldu Jeldusaldéñ nají za naldaldixa izhgakuxanuge iyataná 42 saxa aldoxaldixa.” ³Atshaga na mozhua sigí nas shalda namaklde guakakue kakaxaldikue. Ekue na káguba sha ajanashixá shalda itshanatuka kaxazatualdiamak agatsé zhakuá ijuakuekue, ^v 1.260 ldiuwi^w nají múldigaba naldiñga azaxaitshatualdiamak kakaxaldikue.”

⁴Ejié mozhua namaklde guakakueki Saldiñga netshi Jate kagik zhe nogauxa netshi Sáñkaldá nugeñka axazauwi akldukakue. Ekueki mozhua kaldi oldibu^x jana nekue, mozhua guksé muñshí stualdiamak agaldaka jana nekue. ⁵Naldatshak aguldiñkakueja sha kakualda gualdiák, guksé kauwíj kaxak akskaitshi nuk kayoxaldixa. Akze, mieldeja sha kakualdañga gualdiák, ekí agatsaldi shuigakue kagatsaldaldixa nzha.^y

^s 10.10 Ez 2.8–3.3. Kaltaki matshuwi guiyaba tuakue guaka. ^t 11.1 Sal 48.12-14; Ez 40.3–43.17; Zac 2.1-5 ^u 11.2 Is 63.18; Lk 21.24 ^v 11.3 Jl 1.13 ^w 11.3 1.260 ldiuwiki 42 saxa. 3 kagi naldiniki muan guashi. ^x 11.4 Zac 4.1-14 ^y 11.5 2R 1.10; Jer 5.14

⁶Ai mozhua nekueki Jatetshi múldigaba naldiñga azaxaitshatoxaldieñ ldiuwañki níxalda zéekuaki te nokshaka niuwi kaxaldé.^z Ekíga na, mitsá juizha atshá kakldexaldiák, ni agatséki abildia za akshá atshishá^a guashi niuwi kaxaldaldi na, saldiñga nalda migisalshá guakuek kagik zhekuekue agisalshaldiamak atshá^b guashi niuwi kaxaldé naldaldixa.

⁷Guatshak mitsák namaklde akuashi iyasugakuatshak, ezua béyakze atú guazhámak agatsé sha makuakue^c sehuldúni zhinik iyabexaldinik kaukakshiji kagubiyaldini kakuaxaldixa. ⁸Gualdini kauwiji abuáki kuíbuldudemaxaga saldiñga aldeyēñ sha sha noxaldixa. Exa na kauwiji Sáñkaldá kaldixa axaldiya akuaxananeñkaga na zaldá.^d Eñkaga na aldunaldiñki Sulduma^e azhi Ejiptu axezhuka. ⁹Amak abuákueki sha sha nogatshakna saldiñga kuíbuldu, saldiñga saná, saldiñga sha sha zukuaxa saná na nahauxa zaldakueja maikldiuwi naldiniki muan ai za atuaté aldogatshakna kagi iyashishaháldixa. ¹⁰Egabá ekue shuane shalda kagik zhekuekueki zeñ kakldeshi na, ataba atabañ jika izhgaxáu izhgaxáu zalda ajanashatoxaldixa. Jinake naldakí. Ai mozhua Jatetshi múldigaba naldiñga zaxaitshixakueki zaxaita guiyaba katuñshatone nalguák.

¹¹Gualdini amak maikldiuwi naldiniki muan zegatshake, Jatejañga mokue alduna kagegatshak jeñ izhgate.^f Ekí izhgaldagaté atuatshakna atemajañ zhe kakzukualdixa. ¹²Gualdini ai mozhua nekue jékaldaxa zhinikga múldigaba jaldáñ ekí kaxaldegaté aldukaldixa: “Jexa iyabexa guwíñ.” Kaxaldexaldiake aguldiñkakueja tuatoxaldieñga mauwik jékaldeldi jeñ alditshí gualdixa.

¹³Atshaga na, kakshata atemajañ neyatshake, juwí kuíbulduk uguá taba naldé ezua naldashiñki^g nuk tiñguatshake, káguba 7.000 shuixaldixa. Guatshak abanaldixakueki zhe kakzeshiñgaba, Jate jékaldaxa zalda za na akldé akzamakga agazukualdixa nzha.

¹⁴Ekí zegaté tualdatshake wizhája “wau wau wau, mitsá guiyaba mitualdixa” guaklde mozhuaneki amak zek. Guatshak maiguane atualdixaki mijá nagateñga nakldók.

Kuguane tata axazajuine

¹⁵Ekí tuñgukuenik Jateja guaklde uldeñka kuguaneja tata agasjuigatshake, jékaldaxa múldigaba ekí jaldáñ akuaxaldá:

“Kagik asanek guauxaki Jate nauwiji Sáñkaldatshi za nek ni gu.

Ekíga na, aldēñ zunekualdal gaxaldixa guakldalguamak gaxanetshi za nek ni gu.

Akna saneshi za sanegatoná nzha.^h”

^z 11.6 1R 17.1; Lk 4.25; St 5.17 ^a 11.6 Ex 7.14-25 ^b 11.6 Ex 8-11; Sal 105.26-36

^c 11.7 Aux 13.1; 17.8 ^d 11.8 Aiki Jeldusaldēñ. ^e 11.8 Gn 19.1-24; Jer 23.14

^f 11.11 Ez 37.5 ^g 11.13 “1/10” ^h 11.15 Dn 7.14

¹⁶Ekí akuagatshak, 24 duebakue Jate nugeñka kauwiji sanexa xaldoxék izhoguekueja Jate akldé akzamakga agazukualdiamak ishkajiezhi, nuldu axayoshi ¹⁷ekí akuaxaldá:

“Saldiñga netshi Jatek, Sáñkaldá auxaga kama mixaldé, saldiñga miksuikegaba ni maldá.

Mañki izhoshiñga naxabaldogamakga kaiga jiaga mizhuka,
[niuwizhíne jiaga izhoshiñga mizhogataná,] ‘zeñ nzhakldék’
ni kabikbé.

Jinak ekí mikbeyakí. Mañgaba mijí kama zuxaita ne zhiksui makueniki, saldiñga aksanegapanamalde nak.

¹⁸Akze, saldiñga kuibuldukueki nusá kakzegatogeñga, atemajañ kaxañ guiyaba kabatuñshaldiéñ ldiuwañ zek na gu.ⁱ

Saldiñga shuanekue guiyaba tuakue kagatsé axamizhaxaldiéñ ldiuwañ zek na gu.

Mijí múldigaba naldiñga zuxaitshixakue zwnake mixazauwá nonekue shalda janshizhe maxatshaldiéñ zek na gu.

Ekí maxatshatshaga na mijí nekldekue, ma za akldé mikzukui zhema makizhukakue, ai itsé, ai itsaldagálde axajankakue, ekíga janshizhe kabaxatshaldiéñ zek na gu.

Ne kagik zuzusakuxakueki nuk kakuaxa makualdiéñ zek na gu.”

¹⁹Akuagatshake jékaldaxa juwí Jate izhogaldiñki akpezhatshake eniñga ezua te tu. Aiki Jateja “maiñ na ishkualdiñga izhokuge nakldá” guaka.^j Atshaga na, kuizhbañgui negatshak tubá tubá atshiji, akauldi, kakshata juizhi neyatshak, núgalda atemajañ tinaté tu.

Munzhi somáxalde tune

12 ¹Ekí tuatogukueni atú guazhámak agatsé matshuwi guashi ne ekí agatsaldi alnobaxa izhañká: Ezua munzhi niuwik makue, saxaki axasak izhuka, sáñkaldake 12 zumeya itshekue ijiukue. ²Eñki somáxalde, somája mugatuka, jibañ tuwi akzeshiñgaba jaldáñ na ishkauldatoxá.

³Guatogueña jiaq mokue atú guazhámak agatsé guak guashi ne ekí agatsé alnobaxa izhañká: Takbi janagatsé^k mitsheñshindana, zuxaita atema, atsushi, kugua sáñkaldá izhuka, sáñkaldá izhogauxaki sáñkaldakueja ilshuxa ijiukue, naldatshak uguá katshu aklduka. ⁴Ejañki ají nugik alnobaxa zhinik zumeyakue maiktaba ezua naldashiñki kagildiñgaba aktiñguá. Gueniki egaba ekí atshaté tu: Munzhi somá axaldexaldixa nalgué, naki gushi guatoxeñka takbi janagatse ateema somá naxaldialdi mual axaté, ekíki somá kukatshak, ubañga kuit galdiamak. ⁵Guane naldé, munzhija somá axaldegatshake sigí sukue kuká. Eñki shezhaxalda xálbalde aksuikue saldiñga saná nahauxa

ⁱ 11.18 Sal 2.1-6 ^j 11.19 Ex 25.10-22; Eb 9.4,23 ^k 12.3 “dragón”

aksanexaldixa.¹ Ekí kukañguake ubáñ akugueni Jate nugeñka sanexa xaldoxé nogeñka awaldé. ⁶Guatshake munzhiki zúk zaldi Jatejaña 1.260 ldiuwi numañ atualdiamak janagaktunaldi nakuigaté tu.

⁷Guñgueni jékaldaxa Jateja guaklde uldeñka Migiélki,^m ají nashikue juizhi takbi janagatse ateema kaugakshatshakna, takbi janagatse ateemaki ají nashikue juizhi kaukshiñgaba ⁸guatshak jiaga, ubiya akzegazhá guaté tu. Guñguakna jékaldaxa akldé izhoxa kakibená ⁹guakna, exa zhinik axajeñguá. Guatshak takbi janagatse ateemaki, kasak zhinikga takbijañⁿ izhañkanane, ne aiga na jisé mezhguagakue, migisalshakue,^o káguba zhekuauxa naldagálde nuxa namak ne jañgushatuka. Naldé na, jisé ají nashikue juizhi nuk kagildiñgaba axatiñguá.

¹⁰Ekí tuñgukuenik jékaldaxa ekí múldigaba jaldáñ akuagaté nuká:

“¡Kaiga zúnake Saldiña netshi Jate Nauwijate zúnekualdakldegauxa zúnekuá guatubaldá!

¡Aldéñki ají kamak saldiña jika na nahauxa aksanexaldiéñ akldañká guatubaldá!

¡Aldéñ zúnekualdal gaxaldixa guakldanamak gaxaneki saldiña niuwi ge gua aksuikualdaldixa zek guatubaldá!

Akbiñgaki aldunaldiñki nauwikajakue jisé mezhguagakueja Jate nugéñ kezhuaxal zaña^p nuka naldeki axajeñguá guane nak.

¹¹Akze, Duwe Jesúga jubeju zhauwa janané kauwitsaldí akuaxa guatshak ají abi akzuldanéñ zhinik na, aldéñ ipanekueja jisé aguabiyá guane.

Ekíga na, e shalda namaklde akuaxalga aldoguéñ zhinik aguabiyane.

Ekí ajanashiji guiyaba atuotogotshak jiaga, jai kagik izhoxa za akzé atuagába, e shaldaki shuigakue kagatsexaldiák, amak ashuixaldixa izhajaná guane.

¹²¡Akna saldiña jékaldaxa zhe kaldogauxa zeñ shi zúñneshí!

Naldatshak mieldeke kagixa, nóbunildi zhe minogauxa minekue zúnake, wau wau wau, ¡mitsá guiyaba mitualdixa ne!

Jinake naldakí. Jiséki nauwamé niuwi agabaldá guxá akldogatshak, kaxa agate guane miñgatsabí guane nak.”

¹³Ekí nukatogukuenik ekí tu: Ai takbi janagatse ateema jékaldaxa zhinik axajeñguá guane ilzutuñguakna, munzhi sigí sukue tshaba naldashaldá. ¹⁴Guñguakna munzhiki mozhua gikalda wizhá atematshi

¹ 12.5 Sal 2.9 ^m 12.7 Dn 10.13,21; 12.1; Jd 1.9 ⁿ 12.9 Gn 3.1-15; 2Kt 11.3

^o 12.9 Jiséga na “mezhguagakue”ki “Diablo”, “migisalshakue”ki “Satanás” akuaka.

^p 12.10 Zac 3.1

agaxé.^q Ekíki zúk zaldí juejueni neyaldiamak. Eniñki takbi janagatse ateemaja gugaksá zaldí maigua kagi naldiniki muan Jatejaña numañ atualdiamak janagaktunaldi^r izhakuí. ¹⁵Guñguakna takbi janagatse ateemaja ají kaxak ga munzhi nenamak matshuwi ni uteyá, ekíki nina jana eja galdiamak. ¹⁶Guane nalgué jiaga, kagijañki munzhi agauneshiña izhgajuezhatsshake, takbi janagatse ateemaja nina utene nalgué nuk tuasañguá. ¹⁷Guñguakna takbi janagatse ateemaja munzhi zuxaita aguldiji, atukua abanekue niñkauwañki kaugakshál ne. Ekueki Jateja atsha guakue kakbenamak axatshál za aldoshi, abá naldakí Duwe Jesús shalda namaklde akuaxal za aldukakue na naldá.

13 ¹Ekí tuñgukuenik takbi janagatse ateema nibunkezhaxa axaté.^s

Mozhua béyakze sha makuakuekue

Tuñgukuenik nábunildi zhinik ezua béyakze sha makuakue atú guazhámak agatsé iyabegaté tu. Eñki kugua sáñkalda izhuka, sáñkalda izhogauxak Saldiña netshi Jate aguáñ izhbashi nusagatsaldi mual axezhuka akzukuekue. Naldatshak uguá katsu akldogauxaki sáñkaldakueja sáñkaldak izhalshuxa ijiukuekue. ²Eñki sheñkuinta janagatse, kasakueki béyakze^t sha makuakuetshi janagatse izhuka, naldatshak kaxaki nabitshi janagatse. Ejié na takbi janagatse ateemaja ají kama ageshiña, aldén sanegén sanexaldiamak, atemañ niuwi agé. ³Ai béyakze sha makuakueki kugua sáñkalda izhuka ne, ezuake shuixaldixaga agisane janagatse nalgué mokue janshi akzeklde atuatshakna, káguba kagik zhekuauxakuejañki “jsakí ekí janshi akzegué!” ajañgui axapa aldeyaldá. ⁴Akuñgueni takbi janagatse ateemaki béyakze sha makuakuek niuwi gene nalgué shalda akldé agazukualdá. Ekíga na, béyakze sha makuakue jiaga akldé agazukui, e shalda ekí izhgabeyaldá: “¡Me e janamé naldaldixa ne! ¡Me e na kauksha akzexaldixa ne!”

⁵Gueni béyakze sha makuakueki sekuazhikshiji Jate aguáñ izhbashi mual zukuák noxaldiamak, 42 saxa sanegatoxaldiamak niuwi agaxé. ⁶Guñguake Jate nalda aguashi na, Jate “me ne”, Jate izhogaldi, jékdaxa zhe nogauxa shalda aguáñ izhbashi mual nalda aguaxaldá. ⁷Ekibeña, Jatetshi nekldekue kaukashiji kagubiyaldiamak jiaga niuwi agaxé.^u Ekíga, saldiña kuíbuldu, saldiña saná, saldiña sha sha zukuaxa na nahauxa aksanexaldiamak niuwi agaxegatshakna, ⁸naki saldiña káguba kagik zhe nogauxa nekueja akldé agazukualdá. Ekueki Jateja kagi gauwa zhinikga Jubeju zhauwa Jatek axakuaxa guananteshi aldíbulduk

^q 12.14 Ex 19.4; Dt 32.11 ^r 12.14 Dn 12.7; Aux 12.6 ^s 13.1 Ekí guakáki zhaldiañ azaxaitshanekue ezuakueki 12.18 axaldikue. Guatshak ezuajañki ekí guaka: “ekí tuñgukuenik nibunkezhaxa agaldaxaldatshake”. ^t 13.2 “oso” ^u 13.7 Dn 7.21,25

izhoshiñga izhoxaldiamak kaxazhuka axaldikualdagáldekue na ekí atshaldixa.

⁹Mieldeke kuxa miñkaldikueke muldetua nuka guwíñ:

¹⁰“Mieldekeuki kakuxane kawaldeyaldixa naldiake, amak kawaldeyaldixa.

Azhi mieldekeuki kakuashi” mual kakualdixa naldiake, amak kakuaxaldixa nakldá.”^w

Ekí nakna Jatetshi nekbinekueke jibañ tuabinogéñ abá náaldaki abeti alduna ishál za nogakue miñgatsaldaldixa nzha.

¹¹Ekí tuatogukuenik mokue ezua béyakze sha makuakue atú guazhámak agatsé kagik zhinik izhañkaté tu. Eñki katshu jubeju zhauwatshi janagatse mozhua aklduka, naldatshak takbi janagatse ateema mitsheñshindana agatsé janañga zukuaka. ¹²Eñki kasaklde béyakze sha makuakue axazauwiñga etshiga niuwi aksuikue. Naldakna ejañki kasaklde béyakze shuixaldixaga agisane janagatse mokue janshi akzekldega káguba kagik zhekuekuek akldé akzukushá. ¹³Amak atshiji na, “namak nzhek” axajanaldiamak jika atemajañ ajanashaté atú guazhámak atshatogatshak, kágubakueja tuaté nogéñ jékaldeldi zhinikga guksé kagik akjieñguá zalda jiaga atshá. ¹⁴Ekí kasaklde béyakze sha makuakue axazauwi, ajanashaté atú guazhámak atshá niuwi agaxenamak atshéñ zhinik na, káguba kagik zhekuekue naldagálde namak kajañgushá.^x Ekí kajañgushi, kasaklde béyakze shezhák akiyasalshane shua gualdixa nane iteñga nuká, akldé agazukualdiamak e tuñgatse agakauwal guak.

¹⁵Guñgueni ai tuñgatse axaune nalgué alduna axaldeksa akzexaldiamak kama agaxé. Ekíki zukuagatshak mieldekeujañki akldé agazukuakí naldaldiake aija kakuaxal guaxaldiamak. ¹⁶Ejañga na saldiñga, ai itsé, ai itsaldagálde axajankakue, kabiakue, nashi jika agajueshkakue, áxaldek me izhuka, áxaldek me izhogazhékie juiuzhi sugáxaldak azhi káuxalda jibatshaldi mual kakzuñguakue guak. ¹⁷Guñgueni mielde ekí kagazuñguazhánekueki jika nabesaja azhi izhó guashi azajabiya niuwi kakiyawatí. Guatshake kasaklde béyakze sha makuakuetsi aldé kawatualdiamak etshi iyatatane azhi e azezhuka kaxaldiyanekue za na ekí ajanashaka abá. ¹⁸Akze, jejié izhgajieñguexañki mishkué naldakue. Akna mielde muldetua jika agajienkajañki béyakze sha makuakuetsi izataja sai guashi niya shi gui. Ai izatajaki kágubatshiga nuxa naldatshak 666 nakldá.

^v 13.10 “shezhák” ^w 13.10 Jer 15.2; 43.11. Mauzeñga zalda Jatetshi múldigaba sezhekldék ezuaqueki ekí niñkauwañki guaka: “Mieldejañki axautshi guxane uldeyaldiake, ekíga awaldeyaldixa. Mieldejañki káguba guaxa atshaldiake, ekíga akuaxaldixa.”

^x 13.14 Mt 24.24; 2Ts 2.9-12

Jatetshi akzunanekeue tune

14 ¹Ekí tuatogukueni Jubeju zhauwa guinue Siyóñka^y akté tu. E nañga 144.000 ají nekldekue atualdiamak sugáxaldak aldéñ axezhuka, Ajate axezhuka nañga agazuñguanekue.^z ²Tualdatshake jékaldaxa zhinik nitaxalda jana negaté nukaldatshak, kuizhbañgui atemajañ negamak agatsaldi negatshak, jika azabeñshi jiba agabeñkakue azabeñshatuka jana nuká. ³Guatshake ezua abisa zubeya Jatetshi sanexa xaldoxé, makaiwa benekue, 24 duebakue staxa azabeyaldá. Ai zubeyatukakueki 144.000 káguba Jatetshi naldaldiamak kagixa zhinik keyasabinekue.^a Ekueja za ai zubeya shitiyaka nak, axautshikueja shitiyazháka. ⁴Ekueki Jatetshi nekldekue za izhukakue. Ekí izhoshi na, ni mitsák munzhi^b tushek atshiji nusa ishkazguazhánekue. Jubeju zhauwa mani neyaldí, aldi jiaga agapa neyal nukakue. Ekue na káguba kagixa zhinik keyasabinekue, ekíki gakue axasa jana,^c Jatetshi, Jubeju zhauwatshi za aldaldaldiamak. ⁵Ekuega na ni ji shalda kagatsaldazhé naldi, ni nauwa naldagálde zukuak atshagáldekue.

Maigua Jateja guaklde uldeñkakue

⁶Ekí tuñgukuenik mokue ezua Jateja guaklde uldeñka alnoba mataxa mizhá tu. Eñki ezua múldigaba janshagatse^d naldiña ne saldiña kagik zhekuauxak, saldiña kuíbulduk, saldiña sanák, saldiña sha sha zukuaxa saná na nahauxak akbeyaldiamak aksuikualdakna, ⁷ekí jaldáñ guaxaldá: “Saldiña netshi Jate za zhema miñkizhoshi na akldé akzamakga akzukuwíñ. Jinake naldakí. Aldéñ miñgatsaldi ne guiyaba tuakue axamizhaxaldiéñ zek guane nak. Aldéñ za alnoba, kagi, níbuni, ni nañkajéñ gauwane nakna, jakldé akzamakga akzukuwíñ!”

⁸Guagatogueni Jateja guaklde uldeñka mozhuaneja agapaña ekí guaxaldá: “¡Kuíbuldutema Babilonia^e akaldak akzé akuaka agaldañkashiji axajieñguá, axajieñguá na gu!^f Saldiña kuíbuldu na nahauxa aldéñ na askuildekldana kakzukuiñgaba kazutukshane jana amak katshishixa^g naldé axajieñguá na gu.”

⁹Guagatogueni Jateja guaklde uldeñka maiguaneja jiak ekuek agapaña ekí jaldáñ guaxaldá: “Mieldekuejañki kasaklde béyakze sha

^y 14.1 Sal 2.6; Eb 12.22. Siyóñki Jeldusaldeña. ^z 14.1 Aux 7.4 ^a 14.3 Aux 5.9

^b 14.4 2Kt 11.2. “Munzhi tushek atshiji nusa ishkazguí” guagatshake, aldunaldiñki Jatek za axaldaldi izhogagábaki axautshi akldé akzuku atshá naldaka. ^c 14.4 Ex 23.19

^d 14.6 Duwe Jesú zunekuane shalda guashi naldaka. ^e 14.8 Gn 11.1-9; 2Cr 36.11-21. Kuíbuldu Babiloniaki juldiúkue aguldiji na, kamañ naldi kauwikuíbulduxá kauldenane. Ega na saldiña kutám mikldexa, Jate aguáñ izhbashi mual atshá, Jate naldakí jiaga auxabé izhoxa mikldexa guashi naldaka. ^f 14.8 Is 21.9; Jer 51.6-10 ^g 14.8 Jer 3.1-9; 51.7; Ez 23.29-30,37; Os 1.2; 4.10-19. Ai atsháki aldunaldiñki Jatek za axaldaldi izhogagábaki axautshi akldé akzuku atshá.

makuakue akldé agazukua, e tuñgatse axauwane akldé agazukua, etshi atualdiamak sugáxaldak azhi káuxaldak zhikzuñgua akualdiake, ¹⁰ekue na Jateja guiyaba kaxañ atemajañ katuñshaldixaldia auxaga ishkatuxaldixa.^h Akna Jubeju zhauwaja, Jateja guaklde uldeñka sha atshagáldekueja katuatoxaldieñ gukséxa agubisha tatshui zeñkaⁱ zuxaita guiyaba tu za aldoxaldixa. ¹¹Ekí ni mitsák zhiksekua náaldaki zuxaita guiyaba atuwi, kapuldaksá guakí ijiá akduaná noshiñga aldogataná. Akze, béyakze sha makuakue akldé agazukua, e tuñgatse axaune akldé agazukua, e axezhuka izhgazuñgua akuanekue na ekí aldogataná nzha.”

¹²Ekí nakna Jatetshi nekbinekueke jibañ tuabinogéñ abá náaldaki abetakue miñgatsaldaldixa. Aikuañki Jateja atsha guakue guakldamak atshiji, Duwe Jesú alduna ishál za minukakue.

¹³Ekí tuñgukueni ezua múldigaba jékaldaxa zhinik ekí nagabeyaté nuká: “Ekí kalta gauwa guwá: ‘Kaiga zhinik mieldekueki nauwiji Sáñkaldá Duwe Jesú ipana shuanaldixakueki zeñga aldaldaldixa nzha.’”

Guagatshak Jatetshi Aldunaja ekí guak: “¡Namak nzha! Ekíki jibañ atune shalda izhgasekualdiamak. Akze, Jateja sakí axazauwi jiba axajanashatone zhikjuizhanshazhaldixa nzha.”

Jika gugakuéñ zek guane

¹⁴Ekí tuatogukueñga mauwi abutshi nakizhañká. E bakaldaxaki Jatetshi Asukuága ixagabaldeklde^j janagatse ité tualdatshak, sáñkaldake niuba ijiukue, káuxaldake gakue akukshixa^k zaxa aksuí ité tu. ¹⁵Ekí tuatogukueñ Jateja guaklde uldeñka mokue ezuañki juwí Jate izhogaldi zhinik akzuxaitiñguenik, mauwik izhoguék ekí jaldáñ akbeyá: “Kagixa gakue muñshí neklde gugakué ldiuwañ zek, guakna tuai miksuikuék gugapanabikuká ni gu.” ¹⁶Ekí akbeñguake mauwik izhogueja aksuikualguék tuan atshatshake, kagixa gakue nekldekue nuk guxá.

¹⁷Ekí tuñgukuenik Jateja guaklde uldeñka mokue ezua, ekíga gakue akukshixa zaxa aksuí, jékaldaxa juwí Jate izhogaldi zhinik akskaitá. ¹⁸Gueni Jateja guaklde uldeñka jiak ezua, guksé aksanekaki Jatek jika akiyayogéñ zhinik akzuxaitiñguenik gakue gukshixa zaxa aksuikuek ekí jaldáñ akbeyá: “Kagixa kausú^l zekldegaba nogakna, tuejé zaxa miksuikuek gugapana guwá.” ¹⁹Akbeñguake aksuikualguék tuan atshatshake, kagixa kausú zekldekue nuk gugueniki, itani agasiziñgualdiamak jika atemaxa agatshé. Ekí agasiziñguatshake Jate kaxañ atemajañ guiyaba matuñshakue shalda nuxa guashi.^m ²⁰Kausú axasheneñkaki kuíbulduk akzuxaita zaldi. Exa itani agasiziñguatshake,

^h 14.10 Sal 75.8; Jer 25.15-29 ⁱ 14.10 Aiki asúpalde puldatogéñka. ^j 14.14 Dn 7.13; Aux 1.13 ^k 14.14 “hoz” Shezhá gakue za akukshi jibagabeñka. ^l 14.18 “uva”
^m 14.19 Is 63.1-6; Jl 3.13

axashenén zhinik abi kugua ldiuwi neyashiⁿ axashiji na, juit zaldaki kabayutshi junúkaldaxa yo naldashiña nee zegaté tu.

Kugua Jateja guaklde uldeñkakue

15 ¹Ekí tuatogukueni jékaldaxaga mokue atú guazhámak agatsé matshuwi guashi ne ekí agatsé tu: Kugua Jateja guaklde uldeñkakue kugua agatsalda zuxaita migisalshá guakue aldiwe isuxaldekakue kaksuikue. Ai migisalshá guakuekuek zhinik na Jateja guiyaba kaxañ atemajañ kagixa matuñsha isugakualdixa.

²Ekí tuatogukuéñ níbuni tuñgatse, guksé juizhi zhikbateklde, níkuiti janagatse tubá stuñkaga ka agatsé akbá tu. Exaga béyakze sha makuakuek, e tuñgatse axaunek, etshi axezhuka iyazatanek agubiyanekeki akteté tu. Ekuega na Jatejaña axazabeyaldiamak jika azabeñshi jiba agabeñkakue kagenekue kaksui, ³axazabeyaldá. Ai zubeyaki Jate axazauña nauwibama Mueséja axazubeñka^o nanamak Jubeju zhouwa shaldaga Jate ekí axazabeyá:

“Saldiña netshi Jatek, Sáñkalda auxaga kama mixaldé, saldiña miksuikegaba ni maldá.

‘¡Sakí ekí matshixál!’ zañnekshindana agatsaldiñgaba za jika atemajañ matshixagaba matiuwi.

Saldiña sanákue aksaneshiña za maksanegataná.^p

Ma matshixaki namaklde atshakuamak za matshixa matiuwi.

⁴Nauwijí Sáñkalda maldé, guane ¿mieldeke zhema akizhogakí maldaldaldixa ne?

Guane ¿meki ma za akldé mikzahamakga mikzukuakí naldaldixa ne?

Akze, ma za guana sha atshabálde, janshizhe za naldashibaldá.

Ma jian ne za matshixaki muetsekuá makuakna, saldiña sanákue mixaldaxaldinik

Ma za akldé mikzahamakga migazukualdixa nzha.”

⁵Ekí azabeyaté tuatogukuenik, mokue stu gualdatshake jékaldaxa juwí Jate izhogaldiña, aldéñki nasuñ naña izhuka ne zunatuñshixa nogaldi^q akpezhane te tu. ⁶Eni zhinikga kugua Jateja guaklde uldeñkakue kugua agatsalda migisalshá guakuekue kaksuikuekue aldaxaldá. Ekueki zhakuá janshagatse abutshi tubá aba izhuka ijuakuekue, tabáxaldake niuba kakkakuekue. ⁷Aldagatshak makaiwa benekuega ezuajañki Jateja guaklde uldeñkakuek kugua jaldú niubakue ezua ezua kagé. Jaldukuekue Jate izhoshiña izhogataná guiyaba kaxañ atemajañ matuñshakue

ⁿ 14.20 Anuñka 300 “kilómetro”. ^o 15.3 Ex 15.1-18; Dt 31.30–32.44 ^p 15.3 Mauzeña Jatetshi múldigaba sezhekldek ezuakuejañki ekí guaka: “Saldiña mijí nekldekue aksaneshiña za maksanegataná.” ^q 15.5 Nm 9.15; Ajsh 7.44

jialda akuekue. ⁸Ekí kagegatshake, juwí Jate aldéñ izhogaldi ají kamaki zuxaita muñshí zaldabaga ijiájañ tiñ zek. Ekí zeklde te noshiña, kugua Jateja guaklde uldeñkakueja kugua agatsalda migisalshakue kaksuikue isuxaldegagá noxaldieñgaki, ni me eni juldunazháka naldaldixa nakldá.^r

Kugua migisalshá guakuekue

16 ¹Ekí tuatogukueñki, kugua Jateja guaklde uldeñkakuek jaldáñ agabeji múldigaba Jate izhogaldiña zhinik nuká: “Tuejié kugua jaldú Jate guiyaba kaxañ atemajañ matuñshakue akué miñsuikue kagildiñgaba zúkuate guwiñ.”^s

²Guake kasaklde guaklde uldeñkajañki amak neñgueni jaldú aksuikualdék akué kagildi zu. Zukuatshake kasaklde béyakze sha makuakue tuñgatse axauwane akldé agazukuane, etshi atualdiamak zhikzuñguanekueki sawa shane giemi, agubisha mikzukuakue kagaté.

³Gueni mozhuane guaklde uldeñkajañki jaldú aksuikualdék akué níbunildi zu. Zukuatshake níbuniki akuaxanetshi abi janagatseldia za akbá, negatshake níbunildi bene agatshé noxauxa shuizhá.

⁴Gueni maiguane guaklde uldeñkajañki jaldú aksuikualdék akué ninaldi, ni nañkaxakueldi zukuatshake abildia za akshá nek.

⁵Ekí tuatogukuenik Jateja guaklde uldeñka ni aksanekajañki Jatek ekí akbeyaté nuká:

“Ma za guana janshizhe, sha atshabálde,
izhoshiña naxabaldogamakga kaiga jiaga mizhuka maldé.
Ekí guiyaba tuakue axaketemaldéñ zhinik na, atshakuamak za
matshixa matiuwi.

⁶ Akze, mijí nekldekue, mijí múldigaba naldiña zuxaitshixakue abi
baxé akuaxanekue nak,
¡Ma zhinik kakuakuamak kakuí, abi tugakue kagatsahamak ni
kabatukshí!”

⁷Akbeyatshake jika akiyayogéñ zhinik jiaga ekí agabeyaté nuká:
“¡Namak nzha! Saldiña netshi Jate, nauwiji Sáníkalda maldé,
Mañki auxaga kama mixaldé, saldiña miksuikuegaba ni maldá.
Mañki agatsahamak tuwi, namaklde atshakuamak za guiyaba
tuakue axamizhaka nzha.”

⁸Guagueni makaiwane guaklde uldeñkajañki jaldú aksuikualdék akué niuwik itsukuatshake, niuwija ají guksék káguba yoxaldiamak kama agaxé.

⁹Guane nalgué, amak zuxaita tatshui zekája kayogatshak, sha ajanashixa ni nauwa majiña maja xaldeki Saldiña netshi Jatek axakualdi, ni akldé akzamakga agazukuazhá.^t Guatshak míngaki ai migisalshá guakuekue aksuikue Jateja aguáñ izhbashi mual nalda axakuák.

^r 15.8 Ex 40.34-35 ^s 16.1 Sal 79.6; Sof 3.8 ^t 16.9 Am 4.6-11

¹⁰Ekí zeguenik jatshiwane guaklde uldeñkajañki jaldú aksuikualdék akué kasaklde béyakze sha makuakue sanegaldi zukuatshake, tuañ zaldí abá. Ekí zegatshake káguba eni zhekueki agubisha kakzekaga nuxa juáñgaldak ajauldí zalda ajanashatogatshak, ¹¹agubisha guiyaba atuwéñ zhinik kakzeshi, sawa kagatene kakzeshi na, Jate jékaldaxa izhuka aguáñ izhbashi mual nalda axakuák. Ekí aldeshi na, sha ajanashixa ni nauwa majiñga maja xaldeki Jatek axakualdi akuazhá.

¹²Ekí zeguenik tezhuwane Jateja guaklde uldeñkajañki jaldú aksuikualdék akué ninatema Éhupaldateldi zukuatshake zúk akaná. Ekíki niuwi nañkajaldi zhinik sáñkaldakue kaukshal aldagexañ jiúñgulta janakagaktualdiamak. ¹³Ekí zegaté tuñgukuenik maigua alduna shanekue mokuíjañ izhañká. Ezuañki takbí janagatse atematshi kaxak ga akzaxaitá, ezuañki kasaklde béyakze sha makuakuetshi kaxak ga akzaxaitá, ezuañki kasaklde béyakzetshi múldigaba naldiñga zaxaitshiji naldagálde nekatshi^u kaxak ga akzaxaitaté tu. ¹⁴Ai mokuíjañ izhañkanekueki jisétshi aldunakuega “namak nzhek” axajanaldiamak jika ajanashaté atú guazhámak atshixakue naldé na, Jate kaugakshaldixakue juizhakui neyaldá. Ekíki Saldiñga netshi Jate saldiñga aksuikue auxaga kama axaldeja atemajañ guiyaba katuñshaldiéñ zegatshak, saldiñga kagik zhekuauxatshi sáñkaldakueja kaugagashaldiamak.^v

¹⁵Duwe Jesúja ekí guak: “¡Be minoxaldí! Naski naki miñkaldeji na guapankú. Tusheka miñkizhañkajamakbe miñnegakí noxaldieñga miñkizhañkaldikue nakldá.” Akna zhakuá miñjuizha zalda nogagábaki be jananakizhiktumine minoxaldí. Ekíki jiwabañga tubá miñgatsé neyabináldiamak. Akze, ekí jananakizhiktumine za minukuañañki zeñ minaldaldixakue nzha.”

¹⁶Guatshak amak sáñkaldakue kaukshal kajuizhakuatshak, ebeldeyuke Almajedón axezhogeñka kajuizhakuá.

¹⁷Ekí zegaté tuñgukuenik kuguane Jateja guaklde uldeñkajañki jaldú aksuikualdék akué múlkaldeldi zu. Zukuatshake juwí Jate izhogaldiñga sanexa xaldoxéxa zhinik ezua múldigaba ekí jaldáñ akuák: “¡Auxa zek na gu!” ¹⁸Guagatshake kuizhbañgui negatshak tubá tubá atshiji, akauldi, kakshata kamakualdi atemajañ, ni mitsák káguba naldaldá gueni zhinik neyaté atú guazhámak agatsaldi ne. ¹⁹Neyatshake kuíbuldutema Babildonia akaldak akzé akuaka naldé maiktaba izhgajuekuá. Ekí zegatshake Jateja agatsaldi ne tuwi na, guiyaba kaxañ atemajañ zaxaita tuñshaldixaldiaga izhगतukshá. Ekí zegatshaga na, saldiñga sanákuetshi kuíbulduki nuk tinatshake, ²⁰saldiñga gexákue, kagi nóñgutsekue níbunixaga izhuka naldekue nuk izhogaksá. ²¹Guatshake alnobaldi

^u 16.13 Aux 13.11. Aiki mozhuane béyakze sha makuakuega. ^v 16.14 Jl 3.2,11-12

^w 16.15 Lk 12.39-40; 2Pe 3.10; Aux 3.3

zhinik nógalda atema, jie akzekue^x kágubak itiná. Ekí zuxaita atemajañ migisalshakue ketinatshakna aguáñ izhbashi mual Jate nalda axakuák.

Ezua munzhi béyakze sha makuakuek ite

17 ¹Ekí tuatogukueña Jateja guaklde uldeñkakue kugua neku kugua jaldú aksuikuekuega, ezujajañki naxaldagueni ekí nakbeyá: “Jexa nak guwá. Ezua munzhi zuxaita nakua niñka matshuwi ni agekuekue bakaldaxa ité nuká, Jateja sakí guiyaba tuñshaldixa axetene nubatuñshí. ²Eñki sha atshiji saldiña sanákuetshi sáñkaldakue na askuildekilde. Ekíga atshiji na, káguba kagik zhekuekue kazutukshane jana kakzukuí, aldéñ na askuildek katshishixa nakldá.”^y

³Ekí nakbeñguenik Jatetshi Alduna naksanegatshake aldunaldiña Jateja guaklde uldeñkaki zæk zaldi nauldé. Exa ezua munzhiki béyakze atsushi sha makuakuek ite tualdatshak, ai béyakzeki Jate aguáñ izhbashi nusagatsaldi guashi axezhukaga ka akzukue naldatshak, kugua sáñkaldá izhuka, uguá katshu aklduka tu. ⁴Guatshak munzhiki zhakuá uldikulda atsushi na sezheklde akzé ijuakue, níkuiti, niuba^z janshagatse itshekue. Káuxaldake ezua jaldú niubaga aksuikualdeke diuwi akzaldi kutám atshá, nusagatsaldi axautshi na askuildek atshaneldiagaba akué. ⁵Sugáxaldake ezua axezhuka guak guashi ne ekí axaldikue: “Kuíbuldutama Babilonia akaldak akzé, munzhi nakua niñkatshi jaba, kagik diuwi mikzukuakue na nahauxatshi jaba nzha.” ⁶Ekí tualdatshak munzhiki Jatetshi nekldekuetshi, Duwe Jesú namak za akuagué shalda akuaxanekuetshi abikga stuxa guane tu.

Ekí tualdatshakna “¡sakí shi ekí tuñkú!” atemañ nakldegatshak, ⁷guaklde uldeñkaki ekí naxaldék: “¿Jinak shi ekí mikldék? Munzhi tumalde sakí guashi, e uldeyatuka béyakze sha makuakue kugua sáñkaldá izhuka uguá katshu aklduka sakí guashi nubikbejí. ⁸Béyakze tumaldeki izhuka nane, kaigaki izhogaksá guane ne, sehuldúni zhinik iyabexaldinik, guiyaba tu za nogakualdi neyaldixa. Eñki izhuka nane kaigaki izhogaksá guane mokue izhoxaldá guxá atuatshakna, káguba kagik zhekuekueja ‘¡sakí shi ekí tuñkú!’ kakldexaldixa. Ekueki Jateja kagi gauwa zhinikga izhoshiña izhoxaldiamak aldíbulduk kaxazhuka akzúnazhá guanekue na ekí kakldexaldixa.

⁹“Akze, jalde izhgajeñguexañki mishkué naldakue naldaldixa: Béyakze sha makuakuetshi sáñkaldá kugua nekueki, kugua guinekue munzhi exa ité nuká guashi. ¹⁰Ekí guashiña na, kugua sáñkaldá sanekakue jiaga guashi. Ai sanekakuega na jatshiwaki akjiená guanekue, ezuañki kaiga sanexalga nuka, naldatshak ezua zúnake kaigabeñki nagagá nakldók.

^x 16.21 Anuñka 40 “kilo”. ^y 17.2 Jatek za axaldaldi izhogagábaki axautshi akldé akzukua atshá. ^z 17.4 “oro, perlas”

Akze, ai nagatshak, maldé me sanegakue naldaldixa. ¹¹ Guatshak béyakze sha makuakue izhuka nane, kaigaki izhogaksá guanega na ábiguane sáñkalda sanexaldixa. Ega na kugua sáñkalda sanekakue nañga agatsé ne, mokue izhañkatshak guiyaba tu za nogakualdi neyaldixa nzha.

¹² "Ekíga na, uguá katshu béyakze sha makuakuetshi tumaldeki uguá sáñkalda sanekakue guashi. Ekueki kaigabeñki asanexaldiamak iyaldagagá aldogatshak, maldé nuxa^a ai béyakze sha makuakue na asanexaldiamak niuwi kagaxexaldixa. ¹³ Ekueki ajanashaldixa izhgakualdi aldogatshakna, béyakze sha makuakueja za kauwizheñ agasanek guauxaki aksanexaldiamak niuwi agaxexaldixa. ¹⁴ Gualdinik na Jubeju zhouwa kaugagashaldixa. Guatshak eñki saldiñga netshi Sáñkalda, saldiñga sanék guauxatshi Sáñkalda nakna, ejañga kagubiyaldixa. Ekí ubiyatshak, ají naldaldiamak izhgakuxane abá naldakí amak axatshixakueki akzheñga ekí atshaldixa nakldá."

¹⁵ Ekí guaklde uldeñkaja nakbeñguenik ekí jiaga nakbeyá: "Munzhi nakua niñka matshuwi ni agekuekue bakaldaxa ité matuatshake, niki kuíbuldukue, káguba matshuwi zhikzhekuekue, matshuwi sanákue, sha sha zukuaxa sanákue guashi. ¹⁶ Guatshak katshu uguá nekueja,^b béyakze sha makuakue na aldaldi, munzhi nakua niñka kaguldiyaldixa.^c Ekí kaguldiji na, tubá axazakuí jika nuk iyakuxaldinik ají gataki axaji, guksék ayoxaldixa. ¹⁷ Akze, Saldiñga netshi Jateja aldéñ guak guanaxaki nuk isugakualdiamak ekí zekuane. Aldéñ jañguanamakga ai uguá nekue izhgakualdi nogakue kajañgushi na, agasanek guauxaki béyakze sha makuakueja aksanexaldiamak niuwi agaxexaldixa kajañgushá guane. ¹⁸ Guatshak munzhi tumaldeki ekí guashi: Ega na kuíbuldutema akaldak akzé akuaka kagik káguba aksanek guxakue aksaneka guashi nakldá."

Babildonia akjiená guane

18 ¹ Ekí tuatogukueni jékaldaxa zhinik Jateja guaklde uldeñka mokue ezua zabaté tu. Eñki matshuwi niuwi agaxene naldé, ají muñshí zalda kagik zahauxa istuatshakna ² jaldáñ ekí guak:

"¡Kuíbuldutema Babildonia akaldak akzé akuaka agaldañkashiji agajieñguá, agajieñguá na gu!

Exaki jisétshi alduna shanekuegaba izhoxaldixa za abá na gu.

Exaga na nubá, [béyakze] agatsé gasúñze diuwi mikzukundana agatsekue zhekualdaldixa za abá na gu.

³ Akbiñgaki saldiñga saná na nahauxa aldéñ na askuildeklana kakzukuiñgaba kazutukshane jana amak katshishane.^d

^a 17.12 Ekí guashiña "1 hora" akuaka. ^b 17.16 Aux 17.12-13. Katshukueki uguá sanekakuega. ^c 17.16 Jer 4.30; Ez 16.35-39 ^d 18.3 Jatek za axaldaldi izhogagábaki axautshi aklde akzukua atshá.

Ekí sha atshijiña saldiña sanákuetshi sáñkaldakue na askuildeklde.

Ekíga na, aldéñ zeñ akldexaldiamak zuxaita kakzujabinéñ zhinik na kagi agatsauxa zaldakue numa nabesaxakue kabia kakuanekue nak.”

4 Guñgueni mokue jékaldaxa zhinik múldigaba ekí akuagaté nuká:

“Nají minekuañki, jexa kuíbulduk zhinik akzuxaita guwíñ!

Exa zhekuekue sha ajanashamakga sha atshiji guamiñnegak.

Ekíga, migisalshá guakuekueja kagisalshapanatshak, maiñ jiaga miñgisalshazhaldiamak.^e

5 Akze, zuxaita sha ajanashaneki jékaldaxa yo neká tuñgakna, sakí guiyaba tuakue kagatsé katualdikuéñ akldañká guak ekí kagisalshaldikue.

6 Sakí atshane nake, amakbeñga mutshuizha shi akizhakualdikshijí.^f

Ají jaldu sha atshaneldiagaba akuék axautshikue

kastukshanamakga,

mutshuizha aldéñga izhgatuxaldixa shi siyaxagaxauwí.

7 Aldéñ zeñ akldexaldiamak zuxaita izhgasjabiji sekuazhikshiji izhonauxa,

ekíga akizhbezhuí zuxaita zalda guiyaba atuñshi abauñshiñgaba shi akuí.

Jinake naldakí. Aldunaxa ekí aklddeka nak: ‘Naski munzhi sáñkalda sanekuge ité. Nasga ni mitsák sameyaldekluge mauwashtëñkuge nzha.’^g

8 Akna migisalshá guakuekue shuixa, itshana, maldi makuája ezua ldiuwañgaba axaldaklde agisalshatoxaldiéñ, guksék ayoshi agaldañgashaldixa.

Jate saldiña netshi Sáñkalda auxaga kama naxaldék ekí guiyaba tuakue agatsé axetenuge nahák.”

⁹Guatshak kagik zhekuekuetshi sáñkaldakue sha atshiji e na askuildeshi, e na zhualduxa zeñ kakldexaldiamak zuxaita izhgasjabiji izhonekueki kuíbuldu puldatuka ijiá nitshigaté atuatshakna, e shalda izhajani abauwiñgaba akualdixa. ¹⁰Ekí zuxaita guiyaba tuaté atuatshakna, zhe kakzeshi agajué zeñka akteté noshi ekí akuaxaldá:

“Wau wau wau, wau wau wau, kuíbuldutema Babilonia akaldak mikzé, akaldak kama mikué ne,

jjinak anuñkáte guiyaba mawatuñshi maldeñgaba magaldañgashá guxá!”

¹¹Guatshak numa nabesaxa kagi nauxa zaldakue jiaga e shalda izhajani abauwiñgaba akualdixa. Akbiñgaki ni meja numa kakjabiyaldixa

^e 18.4 Jer 51.6,9,45 ^f 18.6 Jer 50.15,29 ^g 18.7 Sal 10.4-6; Is 47.7-11

naldaksá guwák. ¹²Akze, numa naba akiyasaldiamak akualdeñka nanekueki saldiñga nalda niuba^h níkuiti akzekue, zhakuá anuñka nalda maldé akzekue, saldak agatsekue, uldikulda, atsushi na sezhekldekue. Saldiñga nalda kaldi zauñka we juma izhukagaba. Jíka anuñka naldak zhínik sezhekldekue, katshuk zhínikga sezheklde, kaldi akzekuek zhínikga sezheklde, shezhaxaldakⁱ zhínikga sezheklde, jagi akzék zhínikga sezheklde juizhi. ¹³Ekíga na, jíka we akzukuxagaba, we juma izhaxaldixagaba, we zukualdixagaba, kalwéldia akldé we akzegaba, mantixa akldé akzegaba, pañ sezheka akldé akzé abuldinegaba, zulda abuldiagáldekue, béyakze numa uldeñkakue, jubeju, kabayu, kaldu janagatse kabayuk akldi awaldeñkakue, káguba benekue jiaga ajabiyaldixakue juizhi naba akiyasál akualdeñka nane.

¹⁴Ne kuíbulduk ekí agabeyaldixa: “Jíka mikldunká ‘náxalda guashí’ alduna magauxa namaldekueki nuk migajuezhá guxá tiuwi. Numa zəxaitsha janshatsegaba zeñ mikldexaldiamak mixaldé naneki migitshuaniñga nuk migitshuizhá guxá tiuwi.”

¹⁵Guatshak ekí numa nabagisaji nuxa kabia nekldekuejañki kuíbuldu zəxaita guiyaba tuaté atuatshakna, zhe kakzeshi agajué zeñka akteté noshi, e shalda izhajani abauwiñgaba ¹⁶ekí akuaxaldá:

“Wau wau wau, wau wau wau, kuíbuldutema akaldak mikzé maldé, zhakuá uldikulda atsushi na sezheklde akzé mijuakue, níkuiti, niuba^j janshatse mitshekue jiaga

¹⁷ jjinak anuñkáte numa zəxaitsha mixaldé maldeñgaba naldaksá guxá!”

Guatshakna balku numa uldeñkakuetshi sáñkaldakue, balku uldeñkakue, balkuk neñkakue, balkuk zhínik kasa izhgauxakueki agajué zeñka akteté aldoshi, ¹⁸ai kuíbuldu puldatuka ijíá nitshigaté atuatshakna ekí jaldáñ akuaxaldá: “¡Mielde kuíbuldu e janamé akzé naldaldixa ne!”

¹⁹Akuagatshake e shalda izhajani abauwiñgaba akuatogatshak, ekí izhajanká awatuñshi sáñkaldeldi kaksibuldi izhgazheñgui ekí jaldáñ akuaxaldá:

“Wau wau wau, wau wau wau, kuíbuldutema akaldak mikzé maldé, numa zəxaitsha zəñjabimaldeñ zhínik na saldiñga balku níbunik zəñkaldekueki kabia zənakualmalde ne, jjinak anuñkáte maldeñgaba akldañka makuxá!”

²⁰Akuagatshak ekí jiaga nuká:

“¡Saldiñga jékaldaxa zhe minogauxa, alde kuíbuldu akldañkane shalda zeñ shi miñneshí!

Jatetshi nekbinekuek, Duwe Jesújañga ají múldigaba guaxal mimakaxanekuek,

^h 18.12 “oro, plata, perlas” ⁱ 18.12 “bronce, hierro” ^j 18.16 “oro, perlas”

Jatetshi múldigaba naldiña mizuxaitshixakuek, ¿zeñ shi miñneshi!

Jinake naldakí. Alde kuíbuldu sha mimakuane shalda Saldiña netshi Jatejaña axatshakuamak axatshiji, guiyaba tuakue axeté guane nak.”

²¹ Ekí tuatogukueña Jateja guaklde uldeñka ezua matshuwi kama axaldejañki jagitema izhgaldakshiñgueni, ní bunildi aguteñgueni ekí guak:

“Kuíbuldutama Babilonia akaldak mikzé makuaka, jekibeña maxajeñgualdinik ni mitsák mokue mawatuazhíta naldaldixa.^k

²² Ni mitsák mikenán azabeyá, ni azabeyaldiamak jibagabeña azabeñshá, kuizi axazajuí, tata axazajuí nukabaldáta. Ni káuxaldak jibatshixakue ni mitsák mokue mikenán tuabaldáta. Ni mitsák mokue mikenán jakbalda ishkaldék nukabaldáta.

²³ Ni mitsák mokue muñshí zukuxa mikenán asuñguane muñshí tuabaldáta.

Ni mitsák mokue mikenán numa aldegatukakue zeñ ishkazakuák nukabaldáta naldaldixa.

Jinak ekí migisaldaldixa naldakí.

Exa zalda numa nabesaxakueki kagi zhekuauxa guashiñki akldé akzekue izhogatshak, mañki awaldintik atshiji na, saldiña sanákue naldagálde nuxa namak kajañgushamalde nak.

²⁴ Maña guana Jatetshi nekldekue, ají múldigaba naldiña zuxaitshixakue abi baxé kakuaxamalde.

Ekíga na, kagi agatsauxa akuaxanauxa, maña kakuaxamaldekue nakldá.^l”

Jékaldaxa zeñ kakldeklde

19 ¹ Ekí tuatogukuenik jékaldaxaga zuxaita matshuwi zhigazhekualdi múldigaba jaldán negamak ekí akuagaté nuká:

“¡Nauwijate, nauwijí Sáñkalda, ma za akldé mikzahamakga shi migazukuí!^m

¡Ma za zunekualda miksuikue nzha!

[¡Ma za akaldak mikzahamak mixabetakue nzha!]

¡Ma za akaldak mikzé nzha!

¡Ma za jika na nahauxa maksanekagaba nzha!

² Akze, mañki agatsahamak tuwi, namaklde atshakuamak za guiyaba tuakue axamizhaka.

^k 18.21 Jer 51.63-64 ^l 18.24 Jer 51.49 ^m 19.1 Ekí guashi na “¡Aleluya!” akuaka.

Akna munzhi zuxaita nakua niñka axautshi na askuildeshi izhoguñ" zhinik saldiña kagik zaldakue akzaldakuá guane shalda guiyaba tuñshamalde.

Ekíga na, mixazauñkakue abi baxé kakuaxanamakga akiyushi guiyaba tuñshamalde nzha”

³akuagueni ekí jiaga akuák:

“¡Nauwijí Sáñkalda, akldé mikzahamakga shi migazukuí!

Ekí guiyaba tuñshabaldukaki puldi ijiá akduaná za noshiña noná nzha.”

⁴Gueni 24 duebakue, makaiwa benekue na aldaldi, Jate sanexa xaldoxéxa ité noxé stak akldé akzamakga agazukualdiamak nuldu axayoshi, ekí axaldék:

“¡Ekíga shi naldí! ¡Nauwijí Sáñkalda, akldé mikzahamakga shi migazukuí!”

⁵Gueni sanexa xaldoxé nugéñ zhinik múldigaba ekí akuagaté nuká:

“Saldiña Nauwijate miyaxazauñkakuñ,
aldéñ za zhema miñkizhukakuñ,
ai minzé, ai minzaldagálde miñkajankakue,
¡Nauwijate za akldé akzamakga akzukuwíñ!”

⁶Ekí nukaldatshak zuxaita matshuwi zhigazhekualdi múldigaba negamak, nitaxalda jana negaté nukaldatshak, kuizhbañgui atemajañ negamak agatsaldi ekí jaldáñ akuagaté nuká:

“¡Nauwijí Sáñkalda, akldé mikzahamakga shi migazukuí!
Akze, Saldiña netshi Jate, nauwijí Sáñkalda, auxaga kama
mixaldé, saldiña miksuikuegaba,
¡auxaga sanexaldá ni makú!

⁷¡Guatshak nasuñ zúnake matshuwi zeñ zalda shi zuñneshí!

¡Jate za akldé akzamakga kuizakzukuí!

Jubeju zhauwa numa nexaldieñ zek guwák.º

Aldéñ na numa nexaldixa jiaga janazhiktú guane nak.

⁸Akze, aldéñ na numa nexaldixaki janazhiktualdiamak

zhakuá zuxaita janshatse abutshi itshualdiexañ niuwi agaxé ni gu.”

Guatshak zhakuá amak agatséki Duwe Jesús iyapanane jian ne ajanashixá guashi.^p

⁹Guñgueni Jateja guaklde uldeñkaja ekí nakbeyá: “Ekí kalta gauwa guwá: ‘Mieldekueki Jubeju zhauwa numa nexaldieñka abuzatiakue agabenekueki zeñ aldaldaldixakue nzha’ ” nakbeñgueniki, “Ai

º **19.2** Aux 17.2 º **19.7** Ep 5.25-27,32; Aux 21.9-10. Duwe Jesús numa nexaldixa guagatshak, aldéñ ipananeke na numa neshi jana ishkaldaldi za izhogakualdixa guashi.

^p **19.8** Is 61.10; Zac 3.4; Kls 3.12

múldigaba mikbenugeki Jatetshi múldigaba namakldega nakldá.”¹⁰ Ekí nakbeyatshakna asták akldé akzukualdikuamak nuldu axayoxaldatshak, ekí naxaldék: “¡Ekí atshagába nogwá! ¡Saldiña netshi Jate za akldé akzamakga akzukuwá! Naski ma janaña Jatek axazauñkuge nuxa nakldakú. Ekíga na, Duwe Jesúk zhinik mikaja nekldekue abá naldakí e shalda namaklde akuakakueja Jate axazauwamakga axazauñkuge. Akze, ekí Duwe shalda guakakueki Jatetshi Aldunajaña ají múldigaba naldiña kaldukshanamak guakakue kaksanegamakga kaksanekakue nakldá.”

Kabayu abutshik ite nagatuka

¹¹Nakbeyatshake alnobaki akpezhane te tualdatshak, kabayu abutshi izhañkaté tu. Eñkán ite noxeki “Guagauxabé za Atshixa, Namaklde za ne” axezhuka. Akze, ega na atshakuauxabe agatsé tuwi guiyaba tuñshixa, ekíga kaukshixa. ¹²Ají ubaki guksé nuñkua tuñgatse, sáñkaldake sáñkaldakueja izhalshuxa matshuwi ijiukue, ezua aldén axezhuka aksezheklde axaldikualdeki ni meja aksúñze, askimiñgaba aldén za akué. ¹³Ají zhakuáki abik akbene ijuakue.^q Aldén axezhukaki “Jatetshi Múldigaba”.^r ¹⁴Ek agapaña jékaldaxa zalda kaukshal nagatoxelkueki kabayu abutshikuek ite, zhakuá zuxaita janshagatse abutshi ijuakuekue. ¹⁵Guatshak aldénki kaxake shezhága zaxa^s akzuxaitshixak saldiña saná na nahauxa guiyaba katuñshi kagubiyatshak, shezhaxalda xálbaldek kaksanexaldixa.^t Aldénga kausú agasiziñgualdiamak iyatanamakbé ketanatshake,^u Saldiña netshi Jate auxaga kama axaldé, saldiña aksuikueja kagatsé katuwi zuxaita atemajañ kaxañ guiyaba katuñshi ekí atshaldixa. ¹⁶Guatshak zhakuák nugáxaldake ekí guashi akzuke:

“Saldiña netshi Sáñkaldá, saldiña sanék guauxatshi Sáñkaldaga nzha.”^v

¹⁷Tuñgukueni Jateja guaklde uldeñka mokue ezuañki niuwi bakaldaxa akté tu. Ejañki saldiña nubá alnoba mataxa mishkakuek ekí jaldáñ kakkbeyá: “¡Nak guwíñ! Saldiña netshi Jateja atemajañ mizaldieñ janamiñgaktunéñ zal juizhaldegapanwíñ. ¹⁸Ekíki sáñkaldá akzekuetshi, suldáu aksanekakuetshi, zhe akzegagáldekuetshi abúa gaixañ. Ekíga na, kabayu kaukshal awaldenetshi, ek ite neyatonekuetshi abúa gaixañ, nashikue, nashi naldagáldekue, ai itsé, ai itsaldagálde axajankakue, saldiña aikuetsi abúa gaixañ juizhaldek guwíñ.”^w

¹⁹Ekí nukaldatshake kasaklde béyakze sha makuakue, kagik zhekuauxatshi sáñkaldakue, kauwíj suldáukue juizhi ajuizhaldekldekue tu. Ekueki kabayu abutshik ite nagatuka, ají suldáukue juizhi kaugagashaldiamak. ²⁰Guane naldé, béyakze sha makuakueki iyapaná. Guatshaga na mozhuane béyakze

^q 19.13 Is 63.1-3 ^r 19.13 Jñ 1.1,14 ^s 19.15 Eb 4.12 ^t 19.15 Sal 2.9; Is 11.4

^u 19.15 Aux 14.19-20 ^v 19.16 1Tm 6.15 ^w 19.18 Ez 39.17-20

sha makuakue jiaga iyapaná. Eñki naldagálde neshiñga kasaklde béyakzetshi múldigaba naldiñga zuxaitshi axazauwatogatshakna, namak axajandiamak jika ajanashaté atú guazhámak atshatone. Ekí atshiji na, mieldekuuki kasaklde béyakze sha makuakue tuñgatse axauwane akldé agazukua, etshi atualdiamak zhikzuñgua akuanekueki naldagálde nuxa namak kajañgushane. Nalgué, ai béyakzekue mozhua aldamakga keyapanane nalgué, benekuega guksé niwaga zuxaita tatshuakze^x mayoxá za nogakueñka kakuateyá. ²¹ Guatshak azhiniki kaukschal aldakldekuuki kabayu abutshik ite nakldeja shezhága ají kaxak akzuxaitshixak nuk kakuaguake, saldiñga nubá mataxa mishkakuejañki yau zalda abúa axá.

1.000 kagi zexaldixa

20 ¹Ekí tuatogukueni Jateja guaklde uldeñka mokue ezua, jékaldaxa zhinik zabaté tu. Eñki sehuldú julduneyñshi yabi agaxexake, ai aksui, shezhasha wéngiekue akduwá zabí. ²Gueni takbi janagatse ateema, kasak zhinikga takbijañ izhañkanane,^y ne aiga na jisé mezhguagakue, migisalshakueki^z ipangueni, 1.000 kagi shaklduka noxaldixa shezhashak shakté. ³Gueniki sehuldúni aguteñgueni, juaxaldiyatshak, ni meja soñguazhaldiamak niyá. Ekíki akldéñga saldiñga saná na nahauxa naldagálde nuxa namak ne jañgushál nogazhaldiamak. Gualdini 1.000 kagi zegatshakna nauwa zhauwa iyabesa guakue zexaldixa.

⁴Tuñgukueni 1.000 kagi Duwe Jesús Zunekualka sanegatogatshak e na sanexaldixa niuwi kagaxenekueki sanexa xaldoxékgaba iteté tu. Ekueki mielde agatsé azhi agatsaldakí ne tuwa niuwi kagaxenekue. Ekuega na Duwe shalda namaklde za guaxalga, Jatetshi múldigaba guaxalga aldoguák sha kakuí kakuaxanane, sáñkaldá iyabeñgua kakuaxanane mokue izhgatekue. Ekuega na kasaklde béyakze sha makuakue, ni e tuñgatse axaune akldé agazukuazhánekue, ni etshi atualdiamak sugáxaldak azhi káuaxaldak zhikzuñguazhánekue. ⁵Ekue na shuanaldini kasak misha izhgaldaxaldixakue. Atshak izhgaldagazhánekueki shuanekue noshiñga 1.000 kagi zegatshak za izhgaldaxaldixakue. ⁶Guatshak mieldekuuki shuanaldinik kasak misha izhgaldaxaldixakueki Jatetshi nekldekuuga zeñ naldaldixakue. Ekuega na mutshuizha ne shuixaja^a kauldeyazhíta. Akna Saldiñga netshi Jate, Asukuá Zunekualkak axazauwi múldigaba agaskaitshiji, 1.000 kagi e na sanék noxaldixakue nzha.

Jisé aguabiyaldixa

⁷Gualdini 1.000 kagi zegatshak zunake, jiséki abexanaldi zhinik mokue iyabesaldixa. ⁸Amak iyabesatshakna, kagi maxáiñtaba izhgekuauxa

^x 19.20 “azufre” ^y 20.2 Gn 3.1-15; 2Kt 11.3; Aux 12.9 ^z 20.2 Jiséga na “mezhguagakue”ki “Diablo”, “migisalshakue”ki “Satanás” akuaka. ^a 20.6 Aux 20.14

saldiñga saná na nahauxa nekeuga Gok Magók,^b naldagálde nuxa namak ne kajañgushiji kaukshal kajuizhakualdixa. Guatshakajuizhakuanekueki nibunkezhaxa uwí izáatasa zhekuamakbé naldaldixa. ⁹Ekí kagi agatsauxa zhinik aldaxaldiniki kuíbuldu Jateja izhgajañguxa nogeñka Jatetshi nekldekue zhekueñka iyabatexaldixa. Amak iyabategatshake, guksé jékaldeldi zhinikga kagakjienatshake nuk kayoxaldixa.^c

¹⁰Guatshake jisé naldagálde nuxa namak kakldekshaneki, guksé niwaga zaxaita tatshuakze^d mayoxá za nogakueñka akuateyaldixa. Exaga na, kasaklde béyakze sha makuakue, mozhuaneki naldagálde neshiñga etshi múldigaba zaxaitshixa nañga kakuateyananeñka. Gualdini zaxaita zalda guiyaba atuaksá guakí, atuál za noshiñga aldogataná.

Guiyaba atualdieñka kakuateyane

¹¹Ekí tuñgukuenik sanexa xaldoxé abutshi, atema tualdatshak exa ezua ité tu. Guatshake e nugeñka zhinik alnoba, kagi, mani akldé naldaka naldaksá gui na tuasá. ¹²Ekí tualdatshakna ai itsé, ai itsaldagálde axajanka shuananekue sanexa xaldoxé staxa akteté tu. Tualdatshake anuñka aldíbuldukue izhgapeguenik^e jiak mokue ezua aldíbuldu izhgapegatshak, aiki iyakuanekue izhoshiñga izhoxaldixakuetsi kaxazhuka axaldikue. Guñgueniki aldíbuldukuek sakí ajanashatonauxa kaksezhekldamak kawatuwi, kagatsé azhi kagatsaldagálde ne axakeyaté. ¹³Guatshak níbunija káguba ganalguauxa gegatshak, shuixaja, shuanekue ipankaja jiaga mitsá shuane iyapananalguauxa axegatshakna, ezua ezua ajanashatonauxa kawatuwi, kagatsé azhi kagatsaldagálde ne axakeyaté. ¹⁴Guñgueni shuixa, shuanekue ipanka nañga guksé niwaga mayoxá za nogakueñka kakuateyá.^f Exa makuateya na mutshuizha shuixa naldaldixa. ¹⁵Guatshak mieldeki izhoshiñga izhoxaldiamak aldíbulduk axezhuka axaldiyazhá guane atuñguake,^g guksé niwaga mayoxá za nogakueñka akuateyá.

Abisa alnoba, abisa kagi

21 ¹Ekí tuatogukuenik kasaklde alnoba, kasaklde kagi naldaksá guane nalgué, mokue abisa alnoba, abisa kagi tu.^h Guatshak níbuni zúnake naldaksániñga naldaksá guane. ²Tualdatshakna kuíbuldu Jateja ají za naldaldixa izhgakuxane Jeldusaldéñ abisa, jékaldaxa aldéñ nugeñka zhinik zabaté tu.ⁱ Aiki munzhi numa nexaldixa asewá nexaldixatshi muldetua se izhgaune janamé agatsé. ³Tualdatshak

^b 20.8 Ez 38.2. Ekí guagatshake ai mozhua axezhukakueki saldiñga saná Jate aguldiñkakue na nahauxa nekeuga guashi. ^c 20.9 Ez 38.15-16,22 ^d 20.10 “azufre” ^e 20.12 Dn 7.10 ^f 20.14 1Kt 15.26,55 ^g 20.15 Aux 21.27 ^h 21.1 2Pe 3.10-13 ⁱ 21.2 Eb 11.10; 12.22

Jatetshi sanexa xaldoxé nugéñ zhinik múldigaba ekí jaldáñ akuagaté nuká: “¡Kaigaki Saldiña netshi Jate káguba kenañ izhoxaldá na gu! Ekí kauwikenáñ izhogatshakna ají kuíbuldu za aldaldaldixa. Aldéñ naldi kauwizhéñ na izhogatshakna e za Kauwijate naldaldixa. ⁴Aldéñki ubaldía kakldogauxa kexañgualdixa. Akze, axáñ zalda zekáki naldaksá guakna, shuixa akldé naldazháldixa. Ekibeñga na, itshana, mauwa, mikzexa akldé naldaksá gualdixa nzha.”

⁵Guñgueni sanexa xaldoxéxa ité noxejañki ekí guak: “¡Tu guwíñ, nas na saldiña abisagaba nekshikuge nakldá!” Guñgueni ekí nakbeyá: “Jalde múldigaba ekí guakugeki namaklde alduna ishakue nakna kaltak gauwa guwá.”

⁶Gueni ekí jiaga nakbeyá: “¡Auxa zek na gu! Naski kasaxa zalda naldaldatshak jiak nasga na asugaxa zalda nakú.^j Nasga na mieldeki ni aklduna gualdiake, ni izhoshiña mezhokshakue nañkajéñ zhinikga jabi naldakí akauwaldikue. ⁷Mieldeke kutám atshák agubiyal mizhukake ekíga bieni jana janshizhe miñkatshaldikuauxa mipanaldixa. Guatshakna nas za na Mimijate naldaldatshak, maiñki nají sukuakue giemi minaldaldixa nzha.

⁸”Ekí ne, mieldekueki zhe zaldaxaldekue, namak najañguagáldekue, diuwi akzaldi kutám atshixakue, axautshi guaxa atshixakue, kauwisewá naldagálde na askuildek atshixakue, abuá na atshá guasúñzamak atshixakue, awaldintik atshixakue, jigaba akiyalzabiyaldixa ishkiyatene akldé agazukuxakue, saldiña naldagálde zukuak atshixakue guksé niwaga zuxaita tatshuakze^k mayoxá za nogakueñka izhogakue kagatsexaldixa. Exa neya na mutshuizha shuixa nakldá.”

Jeldusaldéñ abisa

⁹Nakbeñgueni, Jateja guaklde uldeñkakue kugua nekue kugua jaldu aldiwe isuxaldeká kugua agatsalda zuxaita migisalshá guakue jialda akuekue aksuikualguekuega, ezuajañki naxaldagueni ekí nakbeyá: “Jexa nak guwá. Jubeju zhauwa na numa nexaldixa nubatuñshí.” ¹⁰Ekí nakbeñguenik Jatetshi Alduna naksanegatshake, aldunaldiña ezua guinue atema wézhildukaxa nebekshatshake, kuíbuldu Jateja ají za naldaldixa izhgakuxane Jeldusaldéñki, jékaldaxa aldéñ nugeñka zhinik zabaté natuñshá. ¹¹Aiki Jatetshi zuxaita muñshí zaldabaga tubá stuwi janshagatse, jagi níkuiti matshuwi akzé^l janagatse tubá stuñkaga nee ze. ¹²Ai kuíbulduga na jakshizha akldoshi, wézhilduka, weltukaga me yo ibekue ne, 12 jugaxé axaldé. Jugaxé nahauxa Jateja guaklde uldeñkakue axaklduka naldatshak, aiga Isayél ldaxegaba 12 axezhukakue ezua

^j 21.6 Aux 1.8. Ekí guashiña “Alfa y Omega” akuaka. ^k 21.8 “azufre” ^l 21.11 “jaspe” azhi “diamante”

ezua aksezhekldekue.^m ¹³ Ai jugaxékuega na niuwi nañkajaldi mual maigua, niuwi agajienaldi mual maigua, ekígaba maxáiñtaba agatsauxa maigua axaldegaba. ¹⁴ Guatshak jakshizha kuíbulduk ibekue kama gukshaldiamake 12 jagi axajiunekí Jubeju zhauwajaña 12 ají múldigaba guaxal gaxanetshi axezhukakue ezua ezua aksezhekldekue.

¹⁵ Guatshak ai guaklde uldeñka naxazguagatoguejaña kuíbuldu, jugaxé, jakshizha mitsá agatsé guashaldiamak abaldaxá niubaga aksha tu. ¹⁶ Gualdatshak kuíbulduki agekualdi, pakualdi maxáiñtaba zhualduxa agatsé ne, abaldaxák guashatshake agekualdi, pakualdi, akldoshi zhualduxañgaba ne, anuñka mozhua saxa neyashiⁿ ne guajá. ¹⁷ Guñgueni egaba jakshizha guajatshak, eñki suzuáñ^o teñgaba 144 ne guajá. Naldiñki Jateja guaklde uldeñkaja kágubaja guajamak nuxa na guajá.

¹⁸ Guatshak kuíbuldu agatsauxaki niuba naldi negaba janshatse, níkuitiga tubá stuñka. Jakshizhaki niuba níkuiti jaspe^p axezhukaga sezheklde. ¹⁹ Guatshak jakshizha kama gukshaldiamak jagi axajiunekueki saldiña nalda niuba janshatse níkuitigaba iyashene. Kasaklde jagiki “jaspe”^q iyashene, mozhuaneki “sapildu” iyashene, maiguaneki “ágata” iyashene, makaiwaneki “esmeldalda” iyashene, ²⁰ jatshiwanekeki “onise” iyashene, tezhuwanekeki “kuldaldina” iyashene, kuguaneki “kaldisólditu” iyashene, ábiguaneki “beldildu” iyashene, etaguaneki “topasiu” iyashene, uguaneki “kaldisopaldasa” iyashene, ¹¹ neki “jasintu” iyashene, ¹² neki “amatita” iyashene.^s ²¹ Guatshak 12 jugaxékueki 12 ezua nalda níkuiti akzega^t sezheklde. Naldatshak ezua jugaxé nahauxaja ezua agatsalda ai níkuiti nuxa guxane. Kuíbulduldiña jiúñgulda akldé aldeyeñki niuba naldi negaba janshatse, níkuitiga tubá stuñkagaba sezheklde.

²² Ekí tualdatshakna eniña juwí Jate axazakuaká aldéñ izhukaki ni miya te tuazhá. Jinak naldakí. Jate Saldiña netshi Sáñkalda, saldiña aksuikue auxaga kama axaldé, Jubeju zhauwa naña exa izhogatshakna, juwí aldéñ axazakuagaldiña nek guane nak. ²³ Ekíga, kuíbulduk muñshí stualdiamak zuxaita Jatetshi muñshí zaldabaga Jubeju zhauwak stuwéñ zhinik na, ni niuwi, ni saxa muñshí stualdiamak juezhaksá. ²⁴ Ai muñshí zaldabaga na, saldiña saná na nahauxa muldetua zutu aldeyaldiamak kestualdixa. Guatogatshak saldiña kuíbuldutshi sáñkaldakueja jiaga ji janshatse akzé kaxaldé Jate akldé akzamagka akzukui akualdaxaldixa. ²⁵ Guatshak exaki tuañ zalda naldakí nahéñ zhinik na, jugaxékueki akpekue za noshi, ni mitsák agayó guazháldixa. ²⁶ Eniña na saldiña sanákueja jigaba janshatse, akzé kaxaldé akualdaxaldixa.^u ²⁷ Ne eniña ni mitsák akzaldaldekilde, ni diuwi akzaldi kutám

^m 21.12 Ez 48.30-34 ⁿ 21.16 2.200 “kilómetro”. Galdieguke “12.000 estadios”.

^o 21.17 Ezua suzuáñki káuxalda asuxak zhinik suzuáñ yo. 144 suzuáñki 65 “metro” naldashi. ^p 21.18 Azhi “diamante”. ^q 21.19 Azhi “diamante”. ^r 21.20 Azhi “rubí”.

^s 21.19-20 Ex 28.17-21 ^t 21.21 “perla” Atuñkaki ajuiní nōñgutse nuxa.

^u 21.23-26 Is 60.1-3,11,19

atshixakue,” ni naldagálde nuxa namak ne majañgushakuekue juldunazhíta.” Askimiñgaba Jubeju zhauwaja kekuane ají aldíbulduk izhoshiña izhoxaldiamak kaxazhuka axaldiyaneke za ajuldunaldixakue nakldá.

22 ¹ Guñgueni Jateja guaklde uldeñkajaña ezua nina níkuiti janagatse tubá stuñkaga ka agatsé natuñshá.* Aiki ni izhoshiña mezhokshakue Jatetshi, Jubeju zhauwatshi sanexa xaldoxéxa zhinikga zabiji na, ² kuíbulduldiña jiúñgulda akldé aldeyēñ mitakuañ ga z̄xaitixa. Ai zexhake ataba atabañ kaldi izhoshiña mezhokshakue axakldukaki saxa akldañká guashi zegauxa zhenatshak, kagezua zexashiñki 12 juizha zhenka. Ai xaijañki saldiña saná na nahauxa muldetua se akzukuane za kaldokshixa.†

³ Exaki ni ji sha atshák zhinik akzaldaldekldé akldé naldazhaldixa.‡ Exa kuíbulduxaga Jatetshi, Jubeju zhauwatshi sanexa xaldoxé nogatshak, Jate axazauñkaguejañki axazauwi ashekualdaldixa. ⁴ Ekueki sugáxaldak Jate axezhuka agazuñguanekue, e naldiña atualdixa. ⁵ Atshak tuañ zalda akldé naldazhaldixa. Jate saldiña netshi Sáñkalda za auxaga muñshí kalzukuí na, niuwi, ni ji muñshí zukuxa kagajuezhazhaldixa. Gualdinik axazauwi asaneshiña za asanegatoná.¶

⁶ Ekí natuñshatoguenik ekí nakbeyá: “Jalde múldigaba mikbeñkugauxaki namaklde alduna ishakue nakldá. Nauwijate, Saldiña netshi Sáñkalda, aldéña na ají múldigaba naldiña z̄xaitshixakuetshi alduna aksanekajaña miyaxazauñkaguañ sakí zegakue zahamak zegapanká mimatuñshaldiamak, aldéñ guaklde uldeñkuge nakaxanek ni ekí mikbeñkú.”

Duwe Jesúki naki nashi na guapán

⁷ Guatshak Duwe Jesúja ekí guak: “¡Tu guwíñ, naski naki miñkaldeji na guapankú! Mieldekuañki jalde nají múldigaba naldiña guakldugamak sezhekldeja atshakue guagamak atshál minoxaldiake, ¡zeñ minaldaldixakue nzha!”

⁸ Nas Juan naldi na ekígaba nukanuge, tunuge. Ekí Jateja guaklde uldeñkaja amak nakbeji natuñshatshakna, asták akldé akzukualdikuamak nuldu axayoxaldatshak ⁹ ekí naxaldék: “¡Ekí atshagába nogwá! ¡Saldiña netshi Jate za akldé akzamakga akzukuwá! Naski ma janaña Jatek axazauñkuge nuxa nakldakú. Ekíga, aldunaldi mikajakue Jatetshi múldigaba naldiña z̄xaitshixakueja axazauwamakga axazauñkuge. Ekibeña, jalde múldigaba sezhekldeja atshakue guagamak atshál nukakueja Jate axazauwamakbeña, nas jiaga axazauñkuge nakldakú.”

† **21.27** Ekí guagatshake jigaba akiyalzabiyaldixa ishkiyatene akldé agazukuxa shalda guashi akldé ekí akuaka. † **21.27** Is 52.1 † **22.1** Sal 46.4; Ez 47.1; Zac 14.8
 † **22.2** Gn 2.9; Ez 47.12; Aux 2.7 † **22.3** Gn 3.17-19; Alm 8.19-23 † **22.5** Dn 7.27

¹⁰ Guenik ekí jiaga nakbeyá: “Tuejié kaltak Jatetshi múldigaba naldiña zuxaitshi gaumaldeki egabá ziñ mexa nuxa guabaldáldi. Jinake naldakí. Aija zexaldixa guakldamak eñ zexaldá guapanák. ¹¹ Akna kutám za atshiji abá guanekueki atshalga shi aldoshí. Ekíga na, jika tuásasuñ nusagatsekue atshiji abá guanekueki ekí atshalga shi aldoshí. Akze, mieldeki jian atshakuamak za atshixaki ekí atshalga shi noshí. Ekibeña na, mieldeki Jatetshi nekldé sha atshagába izhukakueki akldé akldéña ekí Jatetshi za shi izhoshí.”^b

¹² Guatshak Duwe Jesúja ekí guak: “¡Tu guwíñ, naki miñkaldeji na guapankú! Amak neyaldatshak ezua ezua sakí atshatominaxa shalda miñkatsaldikue naña neyaldikue.^c ¹³ Nasga na kasaxa zalda naldaldatshak jiak nasga na asugaxa zalda nakú.^d Nasga na saldiña nalshapananuge naldaldatshak jiak nasga na saldiña isugakuge nzhakú.

¹⁴”Mieldekueki zhakuá ishkajizhiji jana janshi ishkazakuanéñ^e zhinik kuíbulduldi ajuldunéñ ga ajuldunaka, kaldí izhoshiña mezhokshakue axaka niuwi kaxaldaldaldixakue na zeñ aldaldaldixakue nzha.

¹⁵”Akze, jubaldeldi abaldixakueki diuwi akzaldi kutám za atshixakue, awaldintik atshixakue, kauwisewá naldagálde na askuildek atshixakue, abuá na atshá guasúñzamak atshixakue, axautshi guaxa atshixakue, jigaba akiyalzabiyaldixa ishkiyatene akldé akzukuxakue, saldiña naldagálde zukuaxaldiamak janaktuwi amak atshixakue na ni mitsák juldunazhíta.

¹⁶”Nas Jesúnga, guaklduge uldeñka miñgakaxanuge. Ekíki maiñ nepanamine mishjuizhaldekakuek jalde namakldé miñmeyaldiamak. Nas zhinikga na sáñkaldá Dabíki nakldane, ne jiak naski ek zhinik naklduge nakldakú.^f Naldaldatshak Nasga na zumeya abutshitema muñshí atemajañ stuñkuge muñzegapanatshak zalda nakldakú.^g”

¹⁷Ekí guaguake Jatetshi Aldunaja, Jubeju zhauwa na numa nexaldixa na, ekí akuák: “¡Nak guwá!” Akna mieldejañki ekí nukaldiaké, “¡Nak guwá!” shi guashí. Mieldeki ni aklduna guake, ¡nak shi gui! Aklduna guake, jabi naldakí ni izhoshiña mezhokshakue ¡tuxa shi gui!

¹⁸ Guatshak naski mimeshkaldukshaldikuamak ekí miñmeyaldikue: Jalde kalta Jatetshi múldigaba naldiña zuxaitshi gaunuge nukabinogauxakuañ, mieldejañki guak guazhámak ibuñgua miñgualdiák zúnake, Jatejaña saldiña nalda migisalshá guakuekue jalde kaltak guakldugega miñgisalsaldixa nzha. ¹⁹ Azhi mieldeke jalde kalta Jatetshi múldigaba naldiña zuxaitshi gaunugek múldigaba nauwa ikuxa miñgualdiák zúnake, aiki Jatejaña zeñ zalda miñkatsaldixa jalde kaltak

^b 22.11 Ez 3.27; Dn 12.10 ^c 22.12 Is 40.10; 62.11; Mt 16.27 ^d 22.13 Aux 1.8. Ekí guashiña “Alfa y Omega” akuaka. ^e 22.14 1Jñ 1.7; Aux 3.4-5; 7.14 ^f 22.16 Is 11.1,10; Alm 15.12; Aux 5.5 ^g 22.16 Nm 24.17; 2Pe 1.19

guakldugega kaldi izhoshiñga mezhokshakue gaja miñkiwatiyaldixa.^h
 Ekíga na, kuíbuldu Jateja ají za naldaldixa izhgakuxanexa izhoxa jiaga
 miñkiwatiyaldixa nzha.ⁱ

²⁰Akze, zexaldixa namaklde guakaja ni ekí guak: “¡Akzé! ¡Naski naki
 miñkaldeji na guapankú!”

¡Ekíga shi naldí! Nauwijí Sáñkalda Duwe Jesú, ¡amak nak guwá!

²¹Nauwijí Sáñkalda Duwe Jesúki kaldahauxa atemajañ éegaba guañ
 zwnajañgualga shi noshí.

Ekíga shi naldí.

^h 22.19 Mauzeña Jatetshi múldigaba sezhekldek ezuakuejañki ekí niñkauwañki
 guaka: “Jatejaña izhoshiñga mizhoxaldiamak miñkashuka aldíbulduk axaldikualda
 miñkiwatiyaldixa.” ⁱ 22.18-19 Dt 4.2